

परमेश्वरसे यूहन्नादा उन्बा ताम

चु किताबला बारेरी पाङ्तोःमा

भ्रिबा म्हि: येशूला मुल चेला यूहन्नासे भ्रिबा मुबा। चु यूहन्नासे छार कबुलरी मुबा किताबगदे न्हङला “थार्बा पिन्बा समाचार” देन गोर सोम चिठीगदेएनोन भ्रिबा मुबा।

भ्रिबा ग्ला: समुन्द्रला गुडरी मुबा पत्मोस भिबा ग्लारी भ्रिबा मुबा।

भ्रिबा साल: ओस्पन ईश्वी संवत् ६०-६५ (विक्रम संवत् १४७-१५२) सालला गुडरी भ्रिबा मुबा।

खाल्दा भ्रिबा: एशिया अञ्चलरी मुबा गोर निस मण्डलीगदेदा भ्रिबा मुबा।

चु किताबरी मुबा जम्मान तामगदे परमेश्वरसे यूहन्नादा उन्बा ताम हिन्ना। चु ताम म्राङ्बा धुइरी यूहन्नादा म्हाङ हङ्बान छोर्बा मुबा। यूहन्नादा उन्बा ताम चा दुखला धिनगदेला बारेरी हिन्ना। चु “दुखला धिनगदे” यूहन्नाला धुइरीन शुरु तसी जिन्बा मुबा। तिग्दा भिसम थेनीगदेसे येशू ख्रीष्टदा हाङला प्रभु हिन्ना भिसी विश्वास लबा मुबा। यूहन्नासे खास लसी चु चिठी पढब लबागदेदा आशदेन आँट पिन्बाला लागिरी ओच्छे दुखदेन आपत विपतला धुइरी हाङसे लबा विश्वासरी याङयोङ आतना चिबाला लागिरी बिन्ती लबा मुला।

चु किताबला ल्हाना हङ्बा खण्डगदेरी उन्बा तामदेन म्राङ्बा तामगदेदा चिनुगदेग्याम घोना लबा मुला। चुहङ्बा चिनुगदे थे धुइला विश्वासीगदेसे घोबारी खम्मुबा, तर स्थहान्दो म्हिगदेदा चा घोबारी गाहो तमुबा। हिन्बाम ल्हानान म्हिगदेसे चु किताबला बारेरी थरी थरीला तामगदे पाङ्मुला। तर मुल ताम चा प्रस्टन मुला। थे मुल ताम चुनोन हिन्ना, प्रभु ख्रीष्टग्याम परमेश्वरसे

शैतानदेन ह्वाडला जम्मान शत्रुगदेदा सदनना लागिरी नाश लला। ओच्छे जुन धुइरी शैतानदेन ह्वाडला जम्मान शत्रुगदेथोरी ढाला थे धुइरी परमेश्वरसे ह्वाडदा विश्वास लबा म्हिगदेदा छार स्वर्गदेन छार जम्बुलिङ इन्याम पिन्ना।

मुल तामगदे

- शुरुला तामदेन फ्याफुल्बा १:१-८
- परमेश्वरसे यूहन्नादा उन्बा ताम १:९-२०
- गोर निस मण्डलीगदेदा भिबा चिठी २:१-३:२२
- यूहन्नासे स्वर्ग म्हाङ्बा ४:१-११
- गोर निस लाहा छाप लबा रिल्सी थान्बा किताबला मुठा ५:१-८:५
- गोर निस बिगुलगदे ८:६-११:१६
- अजिङ्गरदेन गोर न्ही जन्तु १२:१-१३:१८
- यूहन्नादा उन्बा अर्गु तामगदे १४:१-१५:८
- परमेश्वरला बोमोसे प्लिङ्बा गोर निस खोरे १६:१-२१
- परमेश्वरसे ह्वाडला शत्रुगदेथोरी ढाबा १७:१-२०:१०
- परमेश्वरसे लबा जम्मान भन्दा लिच्छाला निसाफ २०:११-१५
- छार स्वर्ग, छार जम्बुलिङदेन छार यरूशलेम २१:१-२२:५
- ख्रीष्ट दो:सी योनान फेप्खला २२:६-२१

परमेश्वरसे यूहन्नादा उन्बा ताम

१ चु किताबला जम्मान तामगदे
 येशू ख्रीष्टग्याम उन्बा हिन्ना।
 हाडला गे लबा म्हिगदेसे योनान
 ततोःबा जम्मान तामगदेला बारेरी
 घोख्मगौ भिसी परमेश्वरसे येशू
 ख्रीष्टदा चु जम्मान ताम पिन्जी।
 चु ताम पाङ्बाला लागिरी येशू
 ख्रीष्टसे हाडला गे लबा यूहन्ना
 मुबा ग्लारी स्वर्गदूत गिक पुङ्खजी।
 २ हाडसे म्हाङ्बा जम्मान ताम
 यूहन्नासे पाङ्बा मुला। थेसे पाङ्बा
 परमेश्वरला बचनदेन येशू ख्रीष्टसे
 उन्बा सत्य ताम चुनोन हिन्ना। ३ चु
 किताब पढब लबादेन चु किताबरी
 मुबा परमेश्वरग्याम पाङ्बा बचन
 इयान्सी थे अन्धार भ्रबा जम्मान म्हि
 परमेश्वरग्याम मोलम याङ्बा म्हि
 हिन्ना। तिग्दा भिसम चु जम्मान ताम
 योनान तसेला मुला।

यूहन्नासे फ्याफुल्ला भिसी पाङ्बा

४ एशियारी मुबा गोर निस मण्डलीदा
 डा यूहन्नाग्याम फ्याफुल्ला। दान्देनोन

मुला, डाच्छाएनोन मुबा, दोःसीनोन
 फेप्खबा परमेश्वरग्यामदेन थेला
 ठिला डाच्छापट्टि चिबा गोर निस
 आत्माग्याम एनीगदेदा दयामायादेन
 शान्ति तगै।* ५ ओच्छे परमेश्वरला
 बारेरी जम्मान सत्य ताम उन्बा
 विश्वास लखम्बा येशू ख्रीष्टग्याम-
 सेनोन एनीगदेदा दयामायादेन शान्ति
 तगै। थे सिबागदेग्याम जम्मान भन्दा
 डाच्छा सोबादेन जम्बुलिङ्गरी शासन
 लबा ग्लेगदेलाएनोन ग्ले हिन्ना।*

थेसे य्हाडदा माया लसी हाडला
 कासे पापग्याम फेबा मुला। ६ थेसे
 हाडला आबा परमेश्वरदा तेन्बाला
 लागिरी य्हाडदा परमेश्वरदा पूजा
 लबा म्हिला य्हुल गिक स्होजी।
 थेनोन येशू ख्रीष्टदा सदन सदनना
 लागिरी मानदेन जयजयकार तगै।
 आमेन।*

७ च्यागो, थे खसुरी फेप्खबान

मुला,

थेदा भ्लोसी साइबागदेदेन जम्मान
 म्हिसे थेदा म्हाङ्गला।

ओच्छे जम्बुलिङला जम्मान
य्हलला म्हिगदेसे थेला लागिरी
सुर्दा लला।

हिन्ना चु तनोन तला। आमेन।*

८ जम्मान भन्दा घेन परमप्रभु
परमेश्वरसे चुहङ् भिसी सुङ्बा मुला,
“अल्फादेन ओमेगा† डानोन हिन्ना,”
थे दान्दे मुला, डाच्छाएनोन मुबा,
दोःसीनोन फेप्खला।*

यूहन्नासे येशू ख्रीष्टदा म्राङ्बा

९ डा एनीगदेला ज्योज्यो यूहन्नाएनोन
एनीगदेदेन छ्यामनोन मुला। य्हाङसे
य्हाङला ग्ले येशूदा विश्वास लबासे
लमा दुख नाबा मुला, तसैनोन थेसे
य्हाङदा चु दुख नाबारी आँट पिन्बा
मुला। चुलान लागिरी परमेश्वरसे
य्हाङदा ड्योङ्बा मुला। परमेश्वरला
बचनदेन येशू ख्रीष्टला बारेरी थेःना
लबासे लमा डादा समुन्द्रला गुडरी
मुबा पत्मोस भिबा ग्लारी भोर्सि
थान्बा मुबा। १० प्रभुला धिनकुनु†
डा परमेश्वरला आत्मासे प्लिङ्बा
मुबा। थेनोन धुइरी डाला ग्यापग्याम
बिगुलला हङ्बान घेन काइरी चुहङ्
भिसी पाङ्बान लबा थेःजी, ११ “एसे
जुन ताम म्राङ्गला थे जम्मान ताम

किताब गिकरी भ्रिउ। ओच्छे एफिसस,
स्मुर्ना, पर्गामम, थिआटीरा, सार्डिस,
फिलाडेल्फियादेन लाउडिकिया
शहररी मुबा गोर निस मण्डलीदान
पुङ्गो।”

१२ डाइ डादेन छ्याम ताम पाङ्बा
खाल चीम भिसी ग्याप दोःसी च्यामा
थेरी गोर निस म्हरला नाङसल थान्बा
स्हेदेन, १३ नाङसल थान्बा स्हेला
गुडरी परमेश्वरसे पुङ्खबा म्हि
हङ्बान काङधोनान धोबा क्वान
क्वान्बादेन कुरी म्हरला हङ्बा फित्ता
क्वान्बा म्हि गिकदा डाइ म्राङ्जी।*

१४ थेला थोबोदेन क्रा ऊनदेन ग्लिङ
हङ्बान तार ताबा मुबा। ओच्छे
थेला मी मे ल्हाम हङ्बान मुबा।*

१५ थेला स्थाप चा मेरी खाङ्सी
स्होबा भक्भक्बा काँसला ताङ
हङ्बान मुबा। ओच्छे थेला काङ्
चा स्योङ् ड्यबा हङ्बान मुबा।*

१६ थेला दाहिने छ्यासे गोर निस
सारगदे चुङ्बा मुबा। ओच्छे थेला
सुङ्ग्याम न्हीलोनपट्टि धार मुबा
छ्याबा तरवार थोन्बा मुबा। थेला
स्थाल चा धिनी गुडला धिनीला
स्हेर हङ्बान मुबा।

१७ थेदा म्राङ्मा डा सिबा तेबान

१:८ “अल्फादेन ओमेगा” भिबा चा ग्रीक ग्योइरी शुरुला हिगीदेन जम्मान भन्दा लिच्छाला
हिगी भिबा हिन्ना। चु भिबा चा जम्मान भन्दा डाच्छादेन जम्मान भन्दा लिच्छा हिन्ना।

१:१० “प्रभुला धिनकुनु” भिबा चा प्रभु येशू सिबाग्याम सोबा धिनकुनुदा पाङ्बा हिन्ना।

१:७ दानि ७:१३; मत्ती २४:३०; मर्कू १३:२६; लूका २१:२७; १ थेस ४:१७; जक १२:१०;

यूह १६:३४, ३७ १:८ उन्बा २१:६; २२:१३ १:१३ दानि ७:१३; १०:५

१:१४ दानि ७:६; १०:६ १:१५ इज १:२४; ४३:२

तसी थेला स्थहापरी हिल्जी। तर थेसे
हाडला दाहिने छ्या डाथोरी थान्सी
चुहङ् भिसी सुङ्जी, “थालोङ्गो,
जम्मान स्हे शुरु लबादेन थुम्ना
लबा डानोन हिन्ना।” * १८ सोबाएनोन
डानोन हिन्ना। डा सिबा मुबा।
च्यागो, डा सदनना लागिरी सोबा
मुला। ओच्छे सिबा म्हिगदेला
आत्मा चिबा ग्लादेन[†] कालला
साँचोगदे डादेन छ्यामनोन मुला।
१९ थेतबासेलमा एसे जुन ताम म्राङ्बा
मुला थे भ्रिउ। ओच्छे दान्दे तबा
तामगदेदेन लिच्छा तसेला तामगदे
न्हीनोन भ्रिउ। २० म्हिसे था आयाङ्बा
ताम एसे डाला दाहिने यारी म्राङ्बा
गोर निस सारगदेदेन म्हरला नाडसल
थान्बा स्हे निसला अर्थ चा चुनोन
हिन्ना। गोर निस सारगदे चा मण्डली
निसदा च्याबा म्हिगदे[†] हिन्ना।
ओच्छे म्हरला नाडसल थान्बा स्हे
निस चा मण्डली निस हिन्ना।”

एफिससला मण्डली

२ एफिससरी मुबा मण्डलीदा
च्याबा म्हिदा चु ताम भ्रिउ।
चु ताम यारी गोर निस सार
थोबादेन गोर निस म्हरला नाडसल

थान्बा स्हेला गुङ्ग्याम भ्रबासे
सुङ्बा मुला। २ एसे लबा जम्मान
गेगदे डादा था मुला। ओच्छे एसे
दुख लसी गे लबादेन सेम नासी
चिमुला भिबा ताम डादा था मुला।
आज्यबा गे लबा म्हिगदेदा नाबारी
आखम्मुला भिबा तामएनोन डादा
था मुला। मुल चेला आहिन्सै
मुल चेला हिन्ना भिसी भ्रबागदेदा
च्यासी थेनीगदेदा फट्टा म्हि हिन्ना
भिसी एसे था याङ्बा मुला भिबा
तामएनोन डादा था मुला। ३ ए
थेन्नोन आतना डाला लागिरी दुख
नासी भ्रान्सी चिबा मुला। ४ तर एला
बिरोधरी डाइ पाङ्तो:बा ताम
गिक मुला। थे ताम चा एसे डादा
डाच्छा लबा माया ख्लाबा मुला।
५ थेतबासेलमा ए खानङ्ग्याम
मार ताइजी, थे ताम ढन्गो।
ओच्छे एसे लबा पाप ख्लासी
परमेश्वरपट्टि दो:सी डाच्छा
लबा गे लउ। चुदे ए पाप ख्लासी
परमेश्वरपट्टि आदो:नी भिसम डा
ए मुबा ग्लारी खसी एला नाडसल
थान्बा स्हे थेग्याम ते:ला। ६ तर
एदेन छ्याम ज्यबा तामएनोन
मुला, एसे डाइ हङ् लसीन

१:१८ ग्रीक ग्योइरी सिबा म्हिगदेला आत्मा चिबा ग्लादा ‘हेडिस’ भिसी पाङ्बा मुला। थे
ग्लारी सिबा म्हिगदेला आत्मा परमेश्वरसे जम्मान भन्दा लिच्छा लबा निसाफला धुइ भ्रान्सी
चिमुला (उन्बा ६:८, २०:१३, १४)।

१:२० ल्हानान हङ्बा बाइबलरी चा “मण्डलीदा च्याबा म्हिगदे” भिबादा स्वर्गदूत भिसी
भ्रिबा मुला (उन्बा २:१, ८, १२, १८; ३:१, ७, १४)।

१:१७ यशै ४४:६; ४८:१२; उन्बा २:८; २२:१३

निकोलाइटसगदेला^१ गेदा बिरोध
लबा मुला। ^७जुन म्हिदा ड्यान्बा
सेम मुला, थेसे परमेश्वरला
आत्मासे मण्डलीगदेदा सुङ्बा
ताम ड्यान्सी ज्यना लसी घोउ।
जुन म्हिसे ढाला थेदा परमेश्वरला
बगैँचारी^१ मुबा जुनी पिन्बा दोडला
रो चबारी पिन्ना। *

स्मुर्नाला मण्डली

^८ओच्छे स्मुर्नारी मुबा मण्डलीदा
च्याबा म्हिदा चु ताम भ्रिउ।

चु ताम जम्मान स्हे शुरु लबादेन
जम्मान स्हे थुम्ना लबासे सुङ्बा
मुला, थे सिबा मुबा दोःसी
सिबाग्याम सोबा मुला। * ^९एसे
गाते दुख नाबा मुला भिबा तामदेन
ए गाते प्राडबो मुला भिबा ताम
डादा था मुला। तर पाङ्गनोन
तोःमा ए फ्युकपोन मुला। यहूदी
आहिन्सै यहूदी हिन्ना भिसी
भ्रबा म्हिगदेसे एदा गाते बिरोध
लमुला भिबा तामएनोन डादा
था मुला। थेनीगदे मी शैतानना
म्हिगदे हिन्ना। ^{१०}एनीगदेथोरी
खबारी छ्याइबा दुख म्राङ्सी
थालोङ्गो। च्यागो, एला विश्वास

च्याबाला लागिरी शैतानसे एनीगदे
न्हडला कोइ कोइदा भ्याल्खानरी
भाङ्गला। तर एसे च्युइरे जे दुख
नातोःला। ए सिनोन तोःसै डादा
विश्वास लबा थाख्लागो। ओच्छे
डाइ एदा जुकजुकधोनाला
जुनी याङ्बा इनाम^१ पिन्ना।
^{११}जुन म्हिदा ड्यान्बा सेम
मुला, थेसे परमेश्वरला आत्मासे
मण्डलीगदेदा सुङ्बा ताम ड्यान्सी
ज्यना लसी घोउ। जुन म्हिसे ढाला
थेदा आत्मादा सिना लबा कालसे
तिगै लबारी आखम। *

पर्गाममला मण्डली

^{१२}पर्गामम भिबा ग्लारी मुबा
मण्डलीदा च्याबा म्हिदा चु ताम भ्रिउ।
चु ताम न्हीलोनपट्टि छ्यार्बा धार
मुबा तरवार थोबासे सुङ्बा मुला।
^{१३}ए शैतानना ठि मुबा ग्लारी
चिमुला भिबा ताम डादा था मुला।
तसैनोन एसे डादा विश्वास लसीन
चिबा मुला, ओच्छे विश्वासरी
कोङ्बा तसी चिबा डाइ विश्वास
लखम्बा एन्टिपासदा शैतानसे
शासन लबा ग्लारी एनीगदेलान
डाच्छा साइबा मुबा। थे धुइरीनोन

२:६ निकोलाइटसगदे भिबा चा लुसीला ताम लोप्बा म्हिगदेला समूह हिन्ना।

२:७ “परमेश्वरला बगैँचा” भिबा चा स्वर्गएनोन तखम्ला।

२:१० थे धुइरी खेलरी ढाबा म्हिदा इनाम चा म्हेन्दोला मुकुट पिन्मुबा।

२:७ उत्प २:६; उन्बा २२:२; इज २८:१३; ३१:८

२:८ यशै ४४:६; ४८:१२; उन्बा १:१७; २२:१३ २:११ उन्बा २०:१४; २१:८

एसे विश्वास लबा आखलानी
भिबा तामएनोन डादा था मुला।

१४ तर एला बिरोधरी डाइ
पाइतोःबा तिगै ताम मुला। तिगदा
भिसम एदेन छ्याम कोइ कोइ
बालामसे लोप्बा ताम अन्छार
भ्रबा म्हिगदेएनोन मुला। थेसे
इसाएलीगदेदा पापरी फसब
लबाला लागिरी मूर्तिदा फुल्बा
स्हेगदे चबारीदेन स्थहान्दोदेन
छ्याम ब्रेल्सी भ्रबारी तला भिसी
बालाक ग्लेदा लोप्मुबा।* १५ थेहड्ड
लसीन निकोलाइटसगदेसे लोप्बा
ताम अन्छार भ्रबा म्हिगदेएनोन
एदेन छ्याम मुला। १६ थेतबासेलमा
हाडला पाप ख्लासी परमेश्वरपट्टि
दोःगो। आहिन्सम डा ए मुबा
ग्लारी योनान खला ओच्छे डाला
सुडरी मुबा तरवारसे थेनीगदेदेन
छ्याम लडाइ लला।

१७ जुन म्हिदा ड्यान्बा सेम
मुला, थेसे परमेश्वरला आत्मासे
मण्डलीगदेदा सुड्बा ताम ज्यना
लसी ड्यान्तोःला। जुन म्हिसे
ढाला, डाइ थेदा छुम्सी थान्बा
मन्न पिन्ना। ओच्छे डाइ थेदा
छार मिन भिबा तार युडबा गिक
पिन्ना, थे युडबा याड्बा म्हिसे
बाहेक स्थहान्दो खालैसेन आघो।*

थिआटीराला मण्डली

१८ थिआटीरारी मुबा मण्डलीदा
च्याबा म्हिदा चु ताम भ्रिउ।

चु ताम मेला ल्हाम हड्बा मी मुबा
ओच्छे भक्भक्बा कांस हड्बान
स्थहाप मुबा परमेश्वरला भासे
सुड्बा मुला। १९ एसे तिग तिग
लमुला थे डादा था मुला। एसे
लबा माया, एसे लबा विश्वास,
एसे लबा गेदेन नाबा जम्मान
ताम डादा था मुला। ओच्छे एसे
डाच्छा भन्दा दान्दे ल्हानान गे
लमुला भिबाएनोन डादा था मुला।

२० तर एला बिरोधरी डाइ
पाइतोःबा तामएनोन मुला। एसे
हाडसे हाडदान अगमवक्तास्या
हिन्ना भिसी भ्रबा इजेबेल
भिबा म्रिडम्हेमेदा थेसे म्हन्बा
अन्छार लपुड्जी। थेसे डाला
गे लबा म्हिगदेदा स्थहान्दोदेन
छ्याम ब्रेल्सी भ्रबारीदेन मूर्तिदा
फुल्बा स्हेगदे चबारी तला भिसी
लोप्मुला। चुहड्ड लसी थेसे थेनीगदे-
दा फसब लबा मुला।* २१ डाइ थेदा
हाडला पाप ख्लासी परमेश्वरपट्टि
दोःबारी मौका पिन्जी। तर थे
स्थहान्दोदेन छ्याम ब्रेल्सी भ्रबारी
ख्लासी परमेश्वरपट्टि दोःबारी

२:१४ गन्ती २२:५-७; ३१:१६; व्यव २३:४; गन्ती २५:१-३

२:१७ प्रस्था १६:१४-१५; १६:३३:३४; यूह ६:४८-५०; यशै ६२:२; ६५:१५

२:२० १ राजा १६:३१; २ राजा ६:२२, ३०

आड्यान्नी। २२च्यागो, डाइ थेदा स्हु स्हेर पिन्सी थान्ना। ओच्छे थे म्रिडम्हेमेदेन छ्याम ब्रेल्सी भ्रबागदेसे हाडसे लबा आज्यबा गे रूलासी परमेश्वरपट्टि आदोःनी भिसम डाइ थेनीगदेदा ल्हानान दुखरी थान्ना। २३डाइ थेला ताम ड्यान्सी भ्रबागदे जम्मादान नाश लला। ओच्छे जम्मान मण्डलीगदेसे जम्मालान सेमला तामदेन म्हन्बा ताम म्राड्बादेन था याड्बा डा थेनोन हिन्ना भिसी था याड्ला। डाइ एनीगदे जम्मादान हाड हाडला गे अन्छारला इनाम पिन्ना।

२४तर थिआटीराला मण्डलीरी मुबा थे ताम अन्छार आभ्रबादेन शैतानना सेमरी मुबा ताम अन्छार आभ्रबा स्थहान्दोगदेदा चा डाइ पाड्ला। डाइ एनीगदेथोरी तिगै दुख तना आल। २५तर एनीगदेदेन छ्याम जुन विश्वास मुला, डा आखतेधोना थे विश्वासरी जे कोड्सी चिउ। २६जुन म्हिसे ढाला ओच्छे आसितेधोना डाइ म्हन्बा अन्छार गे लला, थेदा डाइ यहुल यहुलथोरी शासन लबा अधिकार पिन्ना।*

२७जमाहेन्से थेसे फाइला कडी थोसी थेनीगदेथोरी शासन लला। ओच्छे साप्राला ताड थिबा

हड् लसी थेनीगदेला शक्ति नाश तला।

२८डाइएनोन डाला आबाग्याम चु अधिकार याड्बा मुला। थेनीगदेसे ढाजी भिसी उन्बाला लागिरी डाइ थेनीगदेदा स्थहोला सुक्र पिन्ना। २९जुन म्हिदा ड्यान्बा सेम मुला थेसे परमेश्वरला आत्मासे मण्डलीदा तिग सुड्बा मुला, थे ताम ड्यान्सी ज्यना लसी घोतोःला।

सार्डिसला मण्डली

३ सार्डिसरी मुबा मण्डलीदा च्याबा म्हिदा चु ताम भ्रिउ। चु ताम परमेश्वरदा तेन्बा गोर निस आत्मादा तहरी थान्बादेन गोर निस सार थोबासे सुड्बा मुला। एला जम्मान गेगदे डादा था मुला, ए सोबा मुला भिसी मी पाड्मुला, तर ए सिबा मुला। २थेतबासेलमा छोर्सी चिउ, तिगदा भिसम एदेन छ्याम मुबा विश्वास सिबारी छ्याइबा मुला। थेतबासेलमा नाश तबा भन्दा डाच्छान जोगब लसी कोड्ना लसी थान्गो। तिगदा भिसम एसे लबा गे डाइ परमेश्वरदा सेम निबा खाल्ला आस्याप्नी। ३एसे जुन ताम थेःबा मुला ओच्छे लोण्बा मुला, थे ताम ढन्गो। ओच्छे थे

ताम अन्छार भ्रसी हाडला पाप
रुलासी परमेश्वरपट्टि दोःगो। डा
ए मुबा ग्लारी य्हो खबा हङ् लसी
खालैसे था आयाङ्ना लसी खला।
तर होशियार तसी आचिनी भिसम
एसे डा खबा थानोन आयाङ्।*

४ तर सार्डिसरीनोन कोइ कोइ
म्हिगदेसे चा हाडला क्वान
फोहोर^१ तना लबा आरे। थेनीगदे
डादेन छ्यामनोन तार क्वान
क्वान्सी भ्रला। तिग्दा भिसम
थेनीगदे डादेन छ्याम भ्रबाधोनाला
मुला। ५ जुन म्हिसे ढाला थेदा चुहङ्
लसी तार क्वान क्वान्सी पिन्ना।
डाइ थेला मिन जुकजुकधोनाला
जुनीला किताबग्याम खाइमै मेटब
आल। डाइ थेदा डाला आबादेन
आबाला दूतगदेला डाच्छा चु
डालान हिन्ना भिसी पाङ्ला।*

६ जुन म्हिदा ड्यान्बा सेम मुला,
थेसे परमेश्वरला आत्मासे
मण्डलीगदेदा तिग सुङ्बा मुला,
थे ताम ड्यान्सी ज्यना लसी
घोतोःला।

फिलाडेल्फियाला मण्डली

७ फिलाडेल्फियारी मुबा मण्डलीदा
च्याबा म्हिदा चु ताम भ्रिउ।

चु ताम तिगौ दोष आरेबादेन
सत्यसे सुङ्बा मुला। थेदेन छ्याम
दाऊद ग्लेला साँचो मुला, थेसे
ठोङ्बा स्हे खालैसे दुङ्बारी
आखम। ओच्छे थेसे दुङ्बा स्हे
खालैसे ठोङ्बारी आखम।*

८ एसे लबा जम्मान गेगदे डादा था
मुला। च्यागो, डाइ एला लागिरी
खालैसेन दुङ्बारी आखम्बा म्राप
ठोङ्सी थान्बा मुला। एदेन छ्याम
ल्हानान भड आरे भिबा ताम
डादा था मुला। तसैनोन एसे डादा
विश्वास लबा रुलाबा आरे, ए
डाला बचन अन्छार भ्रबा मुला।

९ च्यागो, शैतानना म्हिगदेसे हाड
यहूदी आहिन्सै यहूदी हिन्ना भिसी
लुसीला ताम पाङ्बागदेदा डा
खसी एला काडरी फ्या लपुङ्ला।
ओच्छे डाइ एदा माया लमुला
भिबा ताम थेनीगदेदा घोना
लला।* १० एसे ल्हानान दुख नासी
डाइ कुल्बा ताम ड्यान्बासे लमा
जम्बुलिङला जम्मान म्हिगदेला
विश्वास च्याबा धुइरी तबारी
छ्याइबा घेन दुखग्याम डाइ एदा
जोगब लला।

११ डा योनान खबान मुला। एसे
ढाबा मुकुट खालैसेन ब्यन्सी

३:४ फोहोर क्वान भिबा चा पापी बानीबेहोर हिन्ना। ओच्छे तार क्वान भिबा चा परमेश्वरदा
सेम निबा बानीबेहोर हिन्ना।

३:३ मती २४:४३-४४; लूका १२:३६-४०; उन्बा १६:१५

३:५ प्रस्था ३२:३२-३३; भजन ६६:२८; उन्बा २०:१२; मती १०:३२; लूका १२:८

३:७ यशै २२:२२; अय्यूब १२:१४ ३:६ यशै ४६:२३; ६०:१४; ४३:४

थाभोगै भिसी एदेन छ्याम
मुबा ताम जोगब लसी थान्गो।
१२ जुन म्हिसे ढाला, थेदा डाइ
डाला परमेश्वरला मन्दिरला
थाम स्होला, ओच्छे थे थेग्याम
खाइमै आथोन। डाइ थेथोरी
डाला परमेश्वरला मिन भिला,
जमाहेन्से थे डाला परमेश्वरला
शहरला म्हि दोला। थे शहर डाला
परमेश्वरग्याम स्वर्गहेन्से मार
खबा छार यरूशलेम हिन्ना।
ओच्छे थेथोरी डाइ डाला छार
मिनएनोन भिला।* १३ जुन म्हिदा
ड्यान्बा सेम मुला थेसे परमेश्वरला
आत्मासे मण्डलीगदेदा सुड्बा ताम
ड्यान्सी ज्यना लसी घोटोःला।

लाउडिकियाला मण्डली

१४ लाउडिकियारी मुबा मण्डलीदा
च्याबा म्हिदा चु ताम भ्रिउ।

चु ताम परमेश्वरसे स्होबा जम्मान
स्हेगदेथोरी शासन लबा, आमेन
भिबादेन विश्वास लखम्बा ओच्छे
सत्य ताम उन्बासे सुड्बा मुला।*
१५ एसे लबा गेगदे डादा था मुला।
एन्ह लेप्बा मुला, न्ह सिम्बा मुला।
बरु ए कि सिम्बा तगै कि लेप्बा
तगै भिबा डाला सेम मुला। १६ ए
न्ह लेप्बा मुला न्ह सिम्बा मुला,
तर दालदोल जे मुबासे लमा डाइ

एदा डाला सुड्ग्याम थो भ्याड्बा
हड् लसी भ्याड्बा। १७ एसे
ह्वाडदा डा फ्युकपो मुला, डादेन
छ्याम जम्मान स्हे मुला ओच्छे
डादा तिगै स्हेला खाँचो आरे
भिसी पाङ्मुला, तर ए गाते दया
खबाधोनाला मुला भिबा तामदेन
दुख याड्बा, प्राडबो, कानादेन
लिगन्डी मुला भिबा ताम एदा
था आरे। १८ थेतबासेलमा सदन
फ्युकपो दोबाला लागिरी डाग्याम
मेरी खाड्सी खारेब लबा म्हर
ग्लुउ। थेहड् लसीन एदा पेःबा
खबा लिगन्डी ल्हुइ घप्बाला
लागिरी तार क्वान ओच्छे मी
म्राड्बाला लागिरी मन डाग्याम
ग्लुउ भिबा एदा डाला सल्लाह
मुला।

१९ जुन म्हिदा डाइ माया लला,
थेदा डाइ बड्सी तहरी थान्ना।
थेतबासेलमा भन्सी गे लबारी सेम
लउ, ओच्छे ह्वाडला पाप ख्लासी
डापट्टि दोःगो।* २० च्यागो, डा
खालैला दिमरी खसी ड्योइमा चुदे
खालै म्हिसे डाला काइ थेःसी म्राप
ठोड्जी भिसम डा दिम न्हडरी
खला। ओच्छे थेदेन छ्याम चिसी
चबा थुड्बा लला, थेसेनोन डादेन
छ्यामनोन चिसी चबा थुड्बा
लला।

२१ डाइ ढाजी, ओच्छे डाला आबादेन छ्यामनोन आबाला ठिरी चिबा हङ् लसी जुन म्हिसे ढाला डाइ थेदा डाला ठिरी डादेन छ्यामनोन चिपुङ्ला।
 २२ जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा सुङ्बा ताम ड्यान्सी ज्यना लसी घोटो:ला।

यूहन्नासे स्वर्ग प्राङ्बा

४ जमाहेन्से च्यागो, डाइ स्वर्गरी प्राप गिक ठोङ्बा प्राङ्जी। डाइ डाच्छा थे:बा बिगुलला हङ्बान काङ्ग्याम डादा चुहङ् सुङ्बान लबा डाइ थे:जी। “ए तोर खउ, दाहेन्से तसेला तामगदे डाइ एदा उन्ना।”
 २ जमाहेन्से डा तिक्खुरीन परमेश्वरला आत्मासे प्लिङ्जी। ओच्छे स्वर्गरी म्हि गिक धन्छुयाबान लबा ठि गिक प्राङ्जी। * ३ थेला स्थाल चा भक्भक्बा मणि हङ्बान जेबा मुबा ओच्छे ठिला क्यारक्युर चा भक्भक्बा रत्न हङ्बान लरक्युड मुबा। ४ थे ठिला क्यारक्युर बोगल गिकसे गोर बिल अर्गु ठिगदे मुबा। थेनोन ठिगदेरी बोगल गिकसे बिल

गन्बागदे चिबा मुबा। थेनीगदेसे तार क्वान क्वान्बादेन थोबोरी म्हरला मुकुट कूबा मुबा। ५ थे ठिग्याम तिप्लीङ् हङ् लसी मे थोन्बादेन गडङ्गुडुड मु ठेङ्बा हङ्बा काइ खमुबा। ओच्छे थे ठिला डाच्छापट्टि गोर निस मेदङ् लुङ्बा मुबा। थे मेदङ् चा परमेश्वरला आत्मा निस हिन्ना। * ६ थे ठिला डाच्छापट्टि प्रस्टन प्राङ्बा ऐना हङ्बान समुन्द्र मुबा। *

लिच्छापट्टि एनोन डाच्छापट्टि एनोन लहुइ नाङ्नोन मीनोन मी मुबा गोर बिल छोन्बो जन्तु थे ठिला क्युर्नोन मुबा। ७ थे जन्तुगदे चा गिक च्यान हङ्बा, गिक म्हे बहर हङ्बा, ओच्छे गिकला ली चा म्हिला हङ्बा मुबा, थेहङ् लसीन गिक चा फ्याङ्बान लबा ग्वाइ हङ्बान मुबा। ८ थे गोर बिल छोन्बो जन्तुगदे लाना गोर दु दु भ्याप मुबा। ओच्छे थेनीगदेला भ्यापला पाखापट्टि एनोन न्हङ्पट्टि एनोन मी मुबा। थेनीगदे धिन म्हुननोन थेन आतना चुहङ् भिसी व्हाइ गोमुबा,


“जम्मान भन्दा घेन परमप्रभु परमेश्वर

४:८ चु जन्तु चा जम्बुलिङला जन्तु हङ्बा आहिन। तर परमेश्वरसे यूहन्नादा तिगै ताम उन्बा धुइरी प्राङ्बा ताम पाङ्बा जन्तु हिन्ना।

४:२ इज १:२६-२८; १०:१

४:५ प्रस्था १६:१६; उन्बा १:४; ८:५; ११:१६; १६:१८; इज १:१३; जक ४:२

४:६-७ इज १:२२, ५-१०; १०:१४



रिल्सी थान्बा किताबला मुठा (५:१)

चोखो, चोखो, चोखो^१ मुला।
थे दान्देनोन मुला, डाच्छापानोन
मुबा ओच्छे दोःसीनोन
फेप्खला।”*

६ थे छोन्बो जन्तुगदेसे जुकजुक-
धोनान सोसी चिबा मुल ठिरी
धन्छ्याबादा जयजयकारदेन धन्यवाद
पिन्सी मान लमुबा। १० जमाहेन्से थे
बोगल गिकसे गोर बिल गन्बागदेसे
ठिरी धन्छ्याबा सदन सोसी चिबादा
फ्या लजी। ओच्छे थेनीगदेसे हाड
हाडला मुकुट ठिला डाच्छापट्टि
थान्सी चुहड् भिसी व्हाड गोजी,
११ “जम्मान जयजयकार, मानदेन
शक्ति याड्तोःबा डन्ना प्रभु
परमेश्वर हाड जे हिन्ना।
तिग्दा भिसम जम्मान स्हेगदे
हाडसेन स्होबा हिन्ना।
थे जम्मान स्हे हाडसे म्हन्बा

अन्छारनोन तजी, ओच्छे
स्होजी।”

गोर निस लाहा छाप लसी रिल्सी
थान्बा किताबला मुठा

५ ओच्छे डाइ ठिरी
धन्छ्याबाला दाहिने छ्यारी
रिल्सी थान्बा किताबला मुठा गिक
म्राड्जी। थे किताबरी न्हीलोनपट्टि
भ्रिबा मुबा ओच्छे बन्द लसी ग्ला
निसरी लाहा छाप लबा मुबा।*
२ ओच्छे डाइ शक्तिशाली स्वर्गदूत
गिकदा म्राड्जी। थेसे “चु रिल्सी
थान्बा किताबला मुठारी लबा लाहा
छाप ब्लबादेन ठोड्खम्बाधोनाला
म्हि खाल मुला?” भिसी घेन काइसे
पाड्बान मुबा। ३ तर स्वर्गरी,
जम्बुलिडरी ओच्छे जम्बुलिडला
धिरी चु रिल्सी थान्बा किताब
बलसी च्याबारी खम्बा म्हि खालै
आरेबा। ४ थे रिल्सी थान्बा किताब
बलसी च्याखम्बा म्हि खालैनोन
आस्याप्बासे लमा डा ल्हानान
क्राजी। ५ जमाहेन्से गन्बागदे न्हडला
गिकसे डादा “थाक्रागो, च्यागो,
यहूदा यहूलला दाऊद वंशग्याम
थोन्बा च्यानसेन ढाबा मुला। चु
किताबला ग्ला निसला लाहा छाप
बलसी ठोड्बाधोनाला म्हि चा थेनोन

४:८ चुरी ‘चोखो’ भिबा चा तिगै दोष आरेबादेन जम्मान भन्दा घेन ओच्छे थे भन्दा स्थान्दो
खालै आरे। थेतबासेलमा जम्मासेन थेदा तेन्तोःला।

४:८ इज १:१८; १०:१२; यशै ६:२-३ ५:१ इजि २:६-१०; यशै २६:११

हिन्ना” भिसी भिजी।* ६जमाहेन्से
साइबा थार्बा पिन्बा ग्यु बोगो।[†]
हड्बान खालैदा परमेश्वरला ठिला
गुडरी राप्सी चिबा डाइ म्राङ्जी। थेला
क्युर्सीन गोर ब्लि जन्तुगदेदेन गन्बागदे
मुबा। थेला गोर निस रुदेन गोर निस
मी मुबा। चु चा जम्बुलिङला जम्मान
ग्लारी पुइखबा परमेश्वरला आत्मा
निस हिन्ना।* ७थे फेप्सी मुल ठिरी
धन्छ्याबाला दाहिने छ्याग्याम थे
रिल्सी थान्बा किताबला मुठा किन्जी।
८थेसे थे रिल्सी थान्बा किताबला
मुठा किन्माहेन्से थे गोर ब्लि छोन्बो
जन्तुदेन बोगल गिकसे ब्लि गन्बागदेसे
थार्बा पिन्बा ग्यु बोगोदा फ्या लजी।
जम्मालान यारी वीणादेन ज्यबा
बास्ना खबा धूपसे प्लिङ्बा म्हरला
पोइमो ताङ मुबा। थे ज्यबा बास्ना
खबा धूप चा परमेश्वरला म्हिगदेसे
लबा प्रार्थना हिन्ना।* ९थेनीगदेसे
चुहङ् भिसी छार व्हाइ गिक गोजी,
“चु रिल्सी थान्बा किताबला मुठा
किन्सी

लाहा छाप ब्लबादेन

ठोङ्बाधोनाला ह्वाड जे मुला।

तिग्दा भिसम ह्वाडदा साइबा मुबा,
ओच्छे ह्वाडला कासे जम्मान

वंश, ग्योइ, म्हि, य्हुलदेन

य्हुल्सादा

पापला सय फासी परमेश्वरला
लागिरी ग्लुजी।*

१०य्हाङला परमेश्वरदा तेनौ भिसी
ह्वाडसे थेनीगदेदा परमेश्वरदा
पूजा लबा य्हुल गिक स्होबा
मुला।

ओच्छे थेनीगदेसे जम्बुलिङरी
शासन लला।”*

११दोःसी डाइ च्यामा, परमेश्वरला
ठिदेन जन्तुगदे ओच्छे गन्बागदेला
क्युर्सीन ल्हानान स्वर्गदूतगदेसे व्हाइ
गोबा म्राङ्जी। थेनीगदे लाख, करोड
भयानोन आखम्बाधोना मुबा।*
१२थेनीगदेसे घेन काइरी चुहङ् भिसी
व्हाइ गोबान मुबा,

“जम्मालान लागिरी बलि तबा
थार्बा पिन्बा ग्यु बोगो जे
जम्मान शक्ति, धन सम्पत्तिदेन
ज्ञान बुद्धि,
ओच्छे भड, मान, य्हाल
य्हालदेन जयजयकार
किन्खम्बाधोनाला मुला।”

१३ओच्छे स्वर्गदेन जम्बुलिङ
ओच्छे जम्बुलिङ धिरी, समुन्द्रीदेन
थेरी मुबा जम्मान जन्तुगदेसे चुहङ्
भिसी व्हाइ गोबान लबा डाइ
म्राङ्जी।

“ठिरी धन्छ्याबादेन थार्बा पिन्बा
ग्यु बोगोदा

५:५-६ च्यानदेन थार्बा पिन्बा ग्यु बोगो भिबा चा येसू ख्रीष्टदा पाङ्बा हिन्ना।

५:५ उत्प ४६:६; यशै ११:१, १० ५:६ यशै ५३:३; जक ४:१० ५:८ भजन १४१:२

५:६ भजन ३३:३; ६८:१; यशै ४२:१० ५:१० प्रस्था १६:६; उन्बा १:६ ५:११ दानि ७:१०

सदन सदन जयजयकार, मानदेन
यहाल यहाल,
ओच्छे शक्ति तगै।”

१४ जमाहेन्से थे गोर बिलि छोन्बो
जन्तुसे “आमेन” भिजी। ओच्छे थे
गन्बागदेसे चा फ्या लबान जयजयकार
लजी।

लाहा छाप ब्लबा

६ जमाहेन्से डाइ थे गोर निस
लाहा छाप न्हडला छाप
गिक थाबा पिन्बा ग्यु बोगोसे ब्लबा
म्राङ्जी। थेनोन धुइरी थे गोर बिलि
छोन्बो जन्तुगदे न्हडला गिकसे मु
घुर्बा हड्बान काइरी “खउ” भिसी
पाङ्बा डाइ म्राङ्जी। २ जमाहेन्से डाइ
तार ता गिक म्राङ्जी। थे ताथोरी मुबा
म्हिसे म्यादली गिक थोबा मुबा। थेदा
मुकुट गिक पिन्जी, ओच्छे थे ढाबाला
लागिरी ढाबा म्हि दोःसी थेग्याम
भ्रजी।*

३ थाबा पिन्बा ग्यु बोगोसे दोःसी
न्हीरेमला लाहा छाप ब्लमा अर्गु जन्तु
गिकसे “खउ” भिसी पाङ्बा डाइ
थेःजी। ४ जमाहेन्से डाइ वाला ता गिक
म्राङ्जी। थे ताथोरी मुबा म्हिदा म्हिगदे
न्हडरी गिकसेम गिकदा साइगै भिसी
जम्बुलिङग्याम शान्ति ब्यन्सी भोर्बा
अधिकार पिन्जी। ओच्छे थेदा घ्रेन
तरवार गिकएनोन पिन्जी।*

५ दोःसी थाबा पिन्बा ग्यु बोगोसे

सोमेरेमला लाहा छाप ब्लजी। थे धुइरी
डाइ अर्गु जन्तुसे “खउ” भिसी पाङ्बा
म्राङ्जी। जमाहेन्से डाइ म्लाङ्गै ता
गिक म्राङ्जी। थे ताथोरी मुबा म्हिला
यारी उमाल गिक मुबा। ६ डाइ थे गोर
बिलि छोन्बो जन्तुगदेला गुङग्याम
चुहङ् भिबा काइ थेःजी। “तिरेला
ज्यालासे ग्वा ग्लुबा हिन्सम किलो नाड
ओच्छे जौ ग्लुबा हिन्सम किलो सोम
ग्लुबारी खम्ला। तर छ्युगुला दोडदेन
अङ्गुरला दोडदा चा न्होङ्ना थालउ।

७ ओच्छे थाबा पिन्बा ग्यु बोगोसे
ब्लिरेमला लाहा छाप ब्लजी। थे धुइरी
डाइ अर्गु जन्तुसे “खउ” भिसी पाङ्बा
म्राङ्जी। ८ जमाहेन्से डाइ उर ता गिक
म्राङ्जी। थे ताथोरी क्रेःबा म्हिला मिन
चा “काल” मुबा। ओच्छे थेला लिच्छा
लिच्छा चा सिबा म्हिगदेला आत्मा
चिबा ग्ला मुबा। थेनीगदेदा लडाइ,
अनिकाल, देसानदेन जम्बुलिङला हि
जन्तुगदेग्याम जम्बुलिङला भो बिलिरी
भो गिकदा नाश लबा अधिकार पिन्बा
मुबा।*

९ थेहङ् लसीन थाबा पिन्बा ग्यु
बोगोसे डारेमला लाहा छाप ब्लजी।
थे धुइरी डाइ धूप म्राबा ग्लाला धिरी
परमेश्वरला बचनदेन परमेश्वरला
बारेरी थेःना लबासे लमा स्थान्दोसे
साइबा म्हिगदेला आत्मागदे म्राङ्जी।
१० ओच्छे थेनीगदेसे घ्रेन काइरी
क्रिङ्बान, “जम्मान भन्दा घ्रेन ओच्छे

जम्मान भन्दा चोखोदेन सत्य प्रभु,
हाडसे उन्दा साइबा जम्बुलिङरी
मुबा म्हिगदेला ठीक निसाफ खाइमा
लसी थेनीगदेदा सजाय पिन्ना?”
भिसी भिजी। ११ थेनीगदे जम्मादान
गोर गिक गिक तार क्वान पिन्जी।
ओच्छे थेनीगदेदा एनीगदेदा हङ् लसी
साइतोःबा येशूदा तेन्बा एनीगदेला
जम्मान होदेन ज्योज्यो आले नाना
आडागदेदाएनोन आसाइतेधोना
भ्रान्गो भिसी भिजी।

१२ जमाहेन्से डाइ थार्बा पिन्बा ग्यु
बोगोसे दुरेमला लाहा छाप ब्लबा
म्राङ्जी। थे धुइरी घेन सङ्गुल खजी।
ओच्छे धिनी म्लाङ्गै क्वान हङ्बान
धोपधोप तजी, लनी चा का हङ्बान
वाला तजी।* १३ लाबालुङसरसे
अञ्जीरला दोङ् य्होङ्मा आचिप्बा
रोगदे ताइबा हङ् लसी मुला सारगदे
जम्बुलिङरी ताइजी।* १४ मु चा कागज
हङ्नोन रिल्बान म्हासी निजी। ओच्छे
गङ्गदेदेन समुन्द्रला गुडरी मुबा
ग्लागदे चा हाङ् हाङ्ला ग्लाग्याम
लेःजी।* १५ जमाहेन्से जम्बुलिङला
ग्लेगदे, शासन लबागदे, सिपाहीला
कप्तानगदे, फ्युकपो म्हिगदे, अधिकार
मुबा म्हिगदे, नोकरगदेदेन अर्गु
जम्मान म्हिगदे गङ् गङ्ला रुगदेदेन

पहरागदेरीक्यार लाजी।* १६ थेनीगदेसे
गङ्गदेन पहरागदेदा चुहङ् भिसी भिजी,
“ठिरी धन्छ्याबादेन थार्बा पिन्बा
ग्यु बोगोला बोमोग्याम उन्दा छुम्सी
जोगब लउ।* १७ तिगदा भिसम ठिरी
धन्छ्याबादेन थार्बा पिन्बा ग्यु बोगोसे
निसाफ लसी घेन सजाय पिन्बा धिन
खसी जिन्बा मुला। थे धिनना दुख
खाल्से नाखम्ला?”*

लाख गिकसे बोगल न्हीसे हजार
ब्लिदा छाप लबा

७ जमाहेन्से डाइ गोर ब्लि
स्वर्गदूतगदेदा जम्बुलिङरी,
समुन्द्ररी ओच्छे खजिबै दोडरी
लाबा थाखगै भिसी जम्बुलिङलापट्टि
ब्लिग्यामसेन खबा लाबादा रोकब
लबान जम्बुलिङला कुनी ब्लिरी
राप्सी चिबा म्राङ्जी।* २ ओच्छे
डाइ छोन्बो परमेश्वरला छाप
पुइसी स्यारग्याम स्थान्दो स्वर्गदूत
गिक खबान लबा म्राङ्जी। थेसे
जम्बुलिङदेन समुन्द्रदा न्होङ्ना लबारी
परमेश्वरग्याम अधिकार याङ्बा थे
गोर ब्लि स्वर्गदूतगदेदा घेन काइरी
चुहङ् भिसी भिजी, ३ “उन्से य्हाङ्ला
परमेश्वरला गे लबा म्हिगदेला डोरी
छाप आलतेधोना जम्बुलिङदेन समुन्द्र

६:१२ उन्बा ११:१३; १६:१८; यशै १३:१०; योए २:१०, १३; ३:१५; मत्ती २४:२६;

मर्कू १३:२४-२५; लूका २१:२५ ६:१३ यशै ३४:४ ६:१४ उन्बा १६:२०

६:१५ यशै २:१६, २१ ६:१६ होशै १०:८; लूका २३:३० ६:१७ योए २:११; मला ३:२

७:१ यर्मि ४६:३६; जक ६:५

ओच्छे दोडगदेदा न्होङ्ना थालउ।”*

४ ओच्छे डाइ परमेश्वरला छाप लबा
म्हिगदे गाते मुला भिसी पाङ्बा थे:जी।
जमा इस्राएलला जम्मान वंशग्याम
लसी लाख गिकसे बोगल न्हीसे हजार
ब्लि मुबा।

५ यहूदाला वंशग्याम च्युक न्ही
हजारदा,
रूबेनना वंशग्याम च्युक न्ही
हजारदा,
गादला वंशग्याम च्युक न्ही
हजारदा,

६ आशेर वंशग्याम च्युक न्ही
हजारदा,
नप्तालीला वंशग्याम च्युक न्ही
हजारदा,
मनश्शेला वंशग्याम च्युक न्ही
हजारदा,

७ शिमियोनला वंशग्याम च्युक न्ही
हजारदा,
लेवीला वंशग्याम च्युक न्ही
हजारदा,
इस्साखारला वंशग्याम च्युक न्ही
हजारदा,

८ जबूलूनना वंशग्याम च्युक न्ही
हजारदा,
योसेफला वंशग्याम च्युक न्ही
हजारदा
बेन्यामीनला वंशग्याम च्युक न्ही
हजार
म्हिदा छाप लजी।

तार क्वान क्वान्बागदेला हुल

९ जमाहेन्से डाइ खालै म्हिसे
भयासीन भयाबारी आखम्बा म्हिला
हुल गिक म्हाङ्जी। थेनीगदे जम्मान
यहुल्सादेन वंश ओच्छे यहुलदेन
ग्योइ पाङ्बा म्हिगदे मुबा। थेनीगदे
तार क्वान क्वान्सी यारी खजूरला
हाँगा थोसी मुल ठिदेन थार्बा पिन्बा
ग्यु बोगोला डाच्छापट्टि राप्सी चिबा
मुबा। १० थेनीगदेसे घेन काइरी चुहङ्
भिसी भिजी,

“ठिरी धन्छ्याबा य्हाङला
परमेश्वरदेन
ग्यु बोगोग्यामसेन य्हाङसे थार्बा
याङला।”

११ ओच्छे ठि, गन्बागदेदेन थे गोर
ब्लि छोन्बो जन्तुला क्युर्नोन जम्मान
स्वर्गदूतगदे राप्जी, ओच्छे ठिला
डाच्छापट्टि रूलुप तसी परमेश्वरला
जयजयकार लजी।

१२ “आमेन! य्हाङला परमेश्वरदा
सदन सदन
जयजयकारदेन य्हाल य्हाल,
बुद्धि, धन्यवाद, मान
ओच्छे शक्तिदेन भड तगै। आमेन!”

१३ गन्बागदे न्हङला गिकसे डादा
“तार क्वान क्वान्बा म्हिगदे खाल
हिन्ना, ओच्छे थेनीगदे खानङग्याम
खबा हिन्ना?” भिसी ड्योइजी।

१४ डाइ थेदा “गुरु, थे मी हाङदान

था मुला” भिसी भिमा थेसे डादा चुहङ् भिसी पाङ्जी, “थेनीगदे चा ल्हानान दुख नासी खबा म्हिगदे हिन्ना। थेनीगदेसे हाङ हाङला क्वान थार्बा पिन्बा ग्यु बोगोला कासे खुसी तार तना लबा मुला।* १५थेतबासेलमा थेनीगदे परमेश्वरला ठिला डाच्छापट्टि मुला, ओच्छे थेनीगदेसे धिन म्हुननोन परमेश्वरला मन्दिररी थेदा तेन्मुला। ठिरी धन्छ्याबासे चा थेनीगदेला गुडरी धन्छ्यासी थेनीगदेदा जोगब लला। १६दाहेन्से थेनीगदेदा फो खेन्बै आत, क्युइ फुइबाएनोन आत। ओच्छे थेनीगदेदा धिनीला रापदेन अर्गु खजिबै स्हेला रापसे आक्रो।* १७तिगदा भिसम ठिला गुडरी धन्छ्याबा थार्बा पिन्बा ग्यु बोगो थेनीगदेला गोठालो दोला। ओच्छे थेसेन थेनीगदेदा जुकजुकधोनाला जुनी पिन्बा क्युइला मुलरी भोर्ला। ओच्छे परमेश्वरसेन थेनीगदेला जम्मान मीरूली फ्यासी पिन्ना।”*

निसरेमला लाहा छापदेन म्हरला
पोइमो ताड

८ थार्बा पिन्बा ग्यु बोगोसे
निसरेमला लाहा छाप ब्लमा

स्वर्गरी ओस्पन घण्टा गडसलधोना सुनसान तजी। २जमाहेन्से डाइ परमेश्वरला डाच्छा राप्सी चिबा गोर निस स्वर्गदूतगदेदा म्राङ्जी। ओच्छे थेनीगदेदा गोर निस बिगुल पिन्जी। ३ओच्छे स्थहान्दो स्वर्गदूत गिक म्हरला पोइमो ताड थोसी धूप म्राबा ग्लाला डामरी राप्जी। ठिला डाच्छापट्टि मुबा म्हरला धूप म्राबा ग्लारी परमेश्वरला म्हिगदेला प्रार्थनादेन छ्यामनोन फुल्बाला लागिरी थेदा ल्हानान धूप पिन्जी।* ४स्वर्गदूतला याग्याम ज्यबा बास्ना खबा धूपला म्युगु परमेश्वरला म्हिगदेला प्रार्थनादेन छ्यामनोन परमेश्वरला डाच्छा तोर निजी। ५जमाहेन्से थे स्वर्गदूतसे पोइमो ताड थोसी धूप म्राबा ग्लाला मे पोइमो ताडरी युसी जम्बुलिडरी भ्याङ्जी। ओच्छे गडङगुडुङ मु ठेङ्सी तिप्लीङ खसी सङगुल निजी।*

बिगुलगदे

६जमाहेन्से थे बिगुल थोबा गोर निसनोन स्वर्गदूतगदे बिगुल हाप्बारी ठीक तजी।

७जमाहेन्से जम्मान भन्दा डाच्छापट्टि मुबा स्वर्गदूत गिकसे हाङला बिगुल

७:१४ दानि १२:१; मत्ती २४:२१; मर्कू १३:१६ ७:१६ यशै ४६:१०

७:१७ भजन २३:१; इज ३४:२३; भजन २३:२; यशै ४६:१०; २५:८

८:१३ आमो ६:१; प्रस्था ३०:१, ३

८:५ लेवी १६:१२; इज १०:२; प्रस्था १६:१६; उन्बा ११:१६; १६:१८

हाप्जी। थेनोन धुइरी का दोड्बा सेर्बादेन मे जम्बुलिडरी ल्हानान ताइजी। थेतबासेलमा जम्बुलिडला भो सोमरी भो गिक, दोडगदेला भो सोमरी भो गिक ओच्छे जम्मान छेगदेएनोन क्रोजी।

८ न्हिरेमला स्वर्गदूतसे हाडला बिगुल हाप्बा धुइरी मे लुड्बा घेन गड हड्बा स्हे गिक समुन्द्ररी भ्याङ्जी। ओच्छे समुन्द्रला क्युइ भो सोमरी भो गिक का दोजी। ६ ओच्छे समुन्द्ररी मुबा जम्मान जन्तुगदे भो सोमरी भो गिक सिजी। थेहड् लसीन पानी जहाजगदेएनोन भो सोमरी भो गिक नाश तजी।

१० थेहड् लसीन सोमरेमला स्वर्गदूतसे हाडला बिगुल हाप्जी। थेनोन धुइरी लुड्बा मेला ल्हाम हड्बान घेन सार गिक मुग्याम भो सोम स्योडगदेला भो गिकरीदेन क्युइला मुहानगदेरी ताइजी।* ११ थे सारला मिन “कम्बा” मुबा। थे सारसे भो सोम क्युइरी भो गिक कम्ना लजी। थे कम्बा क्युइ थुड्बा ल्हानान म्हिगदे सिजी।

१२ दोःसी ब्लिरेमला स्वर्गदूतसे हाडला बिगुल हाप्जी। थेनोन धुइरी धिनी, लनीदेन सारगदेला भो सोमला भो गिकरी तिगै स्हेसे तोजी। जमाहेन्से

थेनीगदेला भो सोमरी भो गिक धोप तजी। चुहड् लसी धिनदेन म्हुनएनोन भो सोमरी भो गिक धोपधोप तजी।

१३ डाइ च्याबान लमा मुरी ग्वाइ गिक फ्याड्बान लबा म्राङ्जी। थे ग्वाइसे क्रिड्बान चुहड् भिसी भिजी, “दुखन दुख, जम्बुलिडरी मुबा म्हिगदेदा ल्हानान दुख तला। तिगदा भिसम दाहेन्से बिगुल हाप्बारी बाँकी मुबा अर्गु गोर सोम स्वर्गदूतसे बिगुल हाप्बा धुइ तसी जिन्बा मुला।”

६ दोःसी डारेमला स्वर्गदूतसे हाडला बिगुल हाप्बा धुइरी डाइ मुग्याम जम्बुलिडरी सार गिक ताइबान लबा म्राङ्जी। थे सारदा ल्हानान नुप्बा व्हाडला† म्रापला साँचो पिन्जी। २ थे सारसे ल्हानान नुप्बा व्हाडला म्राप ठोड्मा थेग्याम मेला घेन खाराङ्ग्याम थोन्बा हड्बान म्युगु थोन्जी। थे म्युगुसे लमा धिनीदेन मु धोप तना लजी।* ३ जमाहेन्से थे म्युगु न्हङ्ग्याम तिरीगदे थोन्सी जम्बुलिडरी खजी। थे तिरीगदेदा बिच्छीगदेसे जिबा हड्बान जिबा शक्ति पिन्जी।* ४ जम्बुलिडला छे स्याउलादेन दोडगदेदा तिगै न्होङ्ना थालउ। तर डोरी परमेश्वरला छाप आरेबागदेदा जे दुख पिन्गो भिसी थे तिरीगदेदा कुल्बा मुबा।* ५ थेनीगदेदा

६:१ चु पदरी “ल्हानान नुप्बा व्हाड” भिबा चा म्हड म्हुड चिबा ग्ला हिन्ना (लूका ८:३१; रोमी १०:७; उन्बा ६:२, ११; ११:७; १७:८; २०:१, ३)।

८:१० यशै १४:१२ ६:२ उत्प १६:२८ ६:३ प्रस्था १०:१२-१५ ६:४ इज ६:४

साइनोन चा थासाइगो, तर ला डाधोना दुख पिन्गो भिसी थे तिरीगदेदा अधिकार पिन्जी। थे तिरीगदेसे पिन्बा दुख चा म्हिदा बिच्छीसे जीमा स्हु खबा हङ्बान स्हु खमुबा। ६थे धुइरी म्हिगदे सिबारी म्हाइला, तर थेनीगदे सिआम्याङ्। थेनीगदेसे सिबारी म्हाइला, तर काल चा थेनीगदेग्याम याला। *

७थे तिरीगदे लडाइ लबाला लागिरी निबारी ठीक तबा तागदे हङ्बान म्हाङ्मुबा। थेनीगदेला थोबोरी म्हरला मुकुट हङ्बा स्हे मुबा। ओच्छे थेनीगदेला ली चा म्हिला ली हङ्बान मुबा। * ८थेनीगदेला क्रा म्प्रिडम्हेमेला क्रा हङ्बान हेङ्बा मुबा, ओच्छे स्वा चा च्यान्ना स्वा हङ्बान मुबा। * ९थेनीगदेला कुरी फाइला ढाल क्वान्बा मुबा। ओच्छे थेनीगदे फ्याङ्मा भ्यापग्याम लडाइरी ल्हानान रथदेन तागदे छ्योङ्मा खबा हङ्बान आवाज खमुबा। * १०थेनीगदेला मेःरी चा बिच्छीला हङ्बान दुम मुबा। थेनीगदेला मेःरी म्हिगदेदा ला डाधोना दुख पिन्बा शक्ति मुबा। ११थेनीगदेदा शासन लबा ग्ले चा ल्हानान नुप्बा व्हाङला दूत मुबा। थे दूतला मिन हिबू ग्योइरी एबाङ्गोन मुबा ओच्छे ग्रीक ग्योइरी अपोल्लियोन मुबा। †

१२दुख गिक निसी जिन्जी। तर च्यागो, दोःसी अम्ह दुख न्ही खबारी बाँकी मुला।

१३दुरेमला स्वर्गदूतसे हाङला बिगुल हाप्मा डाइ परमेश्वरला डाच्छा मुबा म्हरला धूप म्प्राबा ग्लाला कुनी ब्लिग्याम चुहङ् भिबा काइ थेःजी। * १४थे बिगुल हाप्मा दुरेमला स्वर्गदूतदा चुहङ् भिबा डाइ थेःजी, “यूफ्रेटिस भिबा घेन स्योइरी खीसी थान्बा स्वर्गदूत ब्लिदा ब्लसी पिन्गो।” १५चुनोन धुइ, चुनोन धिनकुनु, चुनोन ला, चुनोन दिङला लागिरी ठीक लसी थान्बा थे स्वर्गदूत ब्लिदा जम्बुलिङरी मुबा म्हिगदेला भो सोमरी भो गिकदा साइबाला लागिरी पुइबा हिन्ना। १६थेरी ताथोरी क्रेःबा सिपाहीगदे गाते मुला भिबा तामएनोन डादा पाङ्जी। थेरी ताथोरी क्रेःसी खबा सिपाहीगदे बोगल गिक करोड मुबा।

१७डाइ म्हाङ्बा तादेन ताथोरी क्रेःबा सिपाहीगदे चुहङ्बा मुबा, थेनीगदेला कुरी क्वान्बा ढालगदे चा मे हङ्बान वाला ओच्छे पिङ्गैदेन गन्धक हङ्बान उर मुबा। थे तागदेला थोबो च्यान्ना हङ्बान मुबा। थेनीगदेला सुङ्ग्याम मे, म्युगुदेन गन्धक थोन्मुबा। १८थेनीगदेला सुङ्ग्याम थोन्बा मे, म्युगुदेन गन्धकला आपत

६:११ चु मिनना अर्थ चा नाश लबा म्हि हिन्ना।

६:६ अय्यूब ३:२१; यर्मि ८:३ ६:७ योए २:४ ६:८ योए १:६ ६:९ योए २:५

६:१३ प्रस्था ३०:१-३

विपत सोमग्याम जम्बुलिङरी मुबा भो
सोम न्हडला भो गिक म्हिगदे साइजी।
१६ तिग्दा भिसम थे तागदेला सुडदेन
मेःरी शक्ति मुबा। थेनीगदेला मेः चा
बिख मुबा पुखीला थोबो हड्बान
मुबा। ओच्छे थेनीगदेसे म्हिगदेदा
मेःदेन थोबोसे पोर तना लमुबा।

२० तर चुहड्बा आपत विपतग्याम
आसिना जोगब तबा म्हिगदेसे हाड
हाडसे लबा आज्यबा गे ख्लासी
परमेश्वरपट्टि आदोःनी। ओच्छे
थेनीगदेसे म्हुड म्हुडदेन म्राड्आखम्बा,
थेःआखम्बा, भ्राआखम्बा म्हर, म्हुड,
काँस, युडबादेन सिङग्याम स्होबा
मूर्तिगदेदा तेन्बा आख्लानी।* २१ थेहड्
लसीन थेनीगदेसे म्हि साइबा, टुनामुना
लबा, स्थहान्दोदेन छ्याम ब्रेलसी
भ्रबादेन य्हो लबा हड्बा आज्यबा
गेगदे ख्लासी परमेश्वरपट्टि आदोःनी।

रिलसी थान्बा जजाबा किताबला मुठा थोबा स्वर्गदूत

१० जमाहेन्से डाइ स्थहान्दो
शक्तिशाली स्वर्गदूत गिक
स्वर्गग्याम फाण्बान लबा म्राड्जी।
थेसे खसुला क्वान क्वान्बा मुबा,
ओच्छे थेला थोबोरी लरक्युड मुबा।
थेला ली धिनी हड्बान मुबा, ओच्छे
काड चा मेला ल्हाम हड्बान मुबा।
२ ओच्छे थेला यारी ब्लसी थान्बा

जजाबा किताब मुबा। थेसे हाडला
दाहिने काड समुन्द्ररी ओच्छे देब्रे
काड सरी थान्सी राण्जी। ३ थे
स्वर्गदूत च्यान इहार्बा हड् लसी घेन
काइरी क्रिङ्जी। ओच्छे थेसे चुहड्
लसी क्रिङ्मा गोर निस मु गुडुडबासे
पाङ्जी। ४ थे थेःमैछ्याम डाइ भ्रिबारी
छ्याइमुबा। तर स्वर्गग्याम “गोर निस
मु गुडुडबासे पाङ्बा ताम थाभ्रिउ, तर
चु ताम एला सेमरी थान्गो” भिबा डाइ
थेःजी।

५ ओच्छे हाडला काड समुन्द्रदेन
सरी थान्सी राण्बा थे शक्तिशाली
स्वर्गदूतसे हाडला दाहिने या स्वर्गपट्टि
थीजी।* ६ ओच्छे स्वर्ग, जम्बुलिङदेन
समुन्द्र स्होबा ओच्छे थेरी मुबा
जम्मान स्हेगदे स्होबा सदन सोसी
चिबा परमेश्वरला मिनरी घान फाबान
थे स्वर्गदूतसे चुहड् भिसी भिजी,
“दाहेन्से आघइ, ७ तर निसरेमला
स्वर्गदूतसे हाडला बिगुल हाण्बारी
छ्याइबा धुइरी परमेश्वरसे हाडला गे
लबा अगमवक्तागदेदा सुड्बा म्हिसे
था आयाइबा ताम पूरा तला।”

८ जमाहेन्से डाइ थेःबा स्वर्गग्याम
खबा थे काइसे दोःसी डादा चुहड्
भिसी भिजी, “निउ! समुन्द्ररीदेन सरी
काड थान्सी राण्बा थे स्वर्गदूतला
यारी मुबा ब्लसी थान्बा थे किताब
किन्गो।”*

६ओच्छे डाइ थे स्वर्गदूत मुबा ग्लारी निसी थे रिल्सी थान्बा किताबला मुठा ह्वीजी। जमाहेन्से थेसे डादा “ना, चु चउ! एला सुडरी खुदु हङ्गोन केकेला। तर चु ग्लोङ्माहेन्से एला फो न्होङ्ना लला” भिसी भिजी। १०थे स्वर्गदूतला याग्याम डाइ थे रिल्सी थान्बा किताबला मुठा किन्सी चजी। थे चमा डाला सुडरी खुदु हङ्गोन केकेजी, तर चसी जिन्माहेन्से कम्सी डाला फो न्होङ्जी। ११जमाहेन्से थेसे डादा “एसे ल्हानान म्हिगदे, ल्हानान यहुल, ल्हानान यहुल्सा, ल्हानान ग्योइदेन ल्हानान ग्लेगदेला बारेरी परमेश्वरसे उन्बा ताम दोःसी पाङ्तोःला” भिसी पाङ्जी।

परमेश्वरला गे म्हाङ्बा न्ही

११ जमाहेन्से डादा दप्बा स्हे हङ्गबान माला कडी गिक पिन्जी। ओच्छे थेसे डादा चुहङ् भिसी भिजी, “रेःसी परमेश्वरला मन्दिरदेन थेरी धूप म्हाबा ग्ला दप्पो। ओच्छे थेरी पूजा लबा म्हि गाते चीम भ्यागो।” २तर परमेश्वरला मन्दिरला खाङ्गा चा थादप्पो। तिग्दा भिसम थे ग्ला चा अर्गु यहुलला म्हिगदेदा पिन्बा मुला। थेनीगदेसे बोगल न्हीसे ला न्हीधोना

परमेश्वरला शहररी रजाइँ लला।* ३ओच्छे डाला गे स्थान्दो म्हिदा उन्बा म्हि न्हीदा हजार गिकसे ग्यार्ज न्हीसे बोगल सोम धिनधोना बोराला क्वान क्वान्सी परमेश्वरला ताम पाङ्बा अधिकार पिन्ना।”

४डाला गे स्थान्दो म्हिदा उन्बा न्ही चा जम्बुलिङ नाङनोन शासन लबा प्रभुला डाच्छापट्टि मुबा जैतूनना दोङ न्हीदेन नाङसल थान्बा ग्ला न्ही हिन्ना। ५चुदे खालै शत्रुसे थेनीगदेदा न्होङ्ना लबारी म्हाइजी भिसम थेनीगदेला सुङग्याम थोन्बा मेसे थेनीगदेला शत्रुदा नाश लला। थेतबासेलमा चुदे खालै म्हिसे थेनीगदेदा न्होङ्ना लबारी म्हाइजी भिसम थेनीगदेदाएनोन थेहङ् लसीन साइला। ६थेनीगदेसे परमेश्वरसे उन्बा ताम पाङ्बा धुइधोना नाम थाखगै भिसी मु दुङ्बादेन क्युइदा काधोना लबा शक्ति थेनीगदेदेन छ्याम मुला। ओच्छे थेनीगदेसे म्हन्बा धुइरी जम्बुलिङरी थरी थरीला आपत विपत तना लबा शक्तिएनोन थेनीगदेदेन छ्याम मुला।*

७थेनीगदेसे परमेश्वरसे उन्बा ताम पाङ्सी जिन्माहेन्से ल्हानान नुप्बा व्हाङ्ग्याम थोन्सी खबा लोङ्बा खबा जन्तुसे थेनीगदेदेन छ्याम लडाइ लसी थेनीगदेदा भ्रेना लसी साइला।*

११:१ इजि ४०:३; जक २:१-२ ११:२ लूका २१:२४

११:६ १ राजा १७:१; प्रस्था ७:१७-१८; १ शामू ४:८

११:७ दानि ७:७, २१; उन्बा १३:५-७; १७:८

८थेनीगदेला लास थेनीगदेला प्रभुदा कुसरी टाँगब लसी साइबा ग्लाला घेन शहरला ग्यामरीन थान्ना। थे शहर चा सदोमदेन मिश्र यहुल्सा हड्बान हिन्ना।* ९जम्मान यहुल्साला म्हिगदे, जम्मान वंशला म्हिगदे, जम्मान ग्योइ पाइबा म्हिगदेदेन जम्मान यहुलला म्हिगदेसे थेनीगदेला लास सोमरेसे धिन गडसालधोना च्याला। ओच्छे थेनीगदेला लास ल्हुआपुड। १०चु न्हीदा साइबा म्हाइसी जम्बुलिङला म्हिगदे ताइसी हाड हाड न्हडरी गिकसेम गिकदा उपहार पिन्बा किन्बा लला। तिग्दा भिसम चु अगमवक्ता न्हीसे जम्बुलिङला म्हिगदेदा ल्हानान दुख पिन्बा मुबा।

११तर सोमरेसे धिन गडसल तमाहेन्से जुनी पिन्बा सा परमेश्वरग्याम खसी थेनीगदे न्हडरी वाइजी। ओच्छे थेनीगदे सिबाग्याम सोसी डोड रे:जी, थे म्हाइसी म्हिगदे ल्हानान लोइजी।* १२जमाहेन्से थे अगमवक्ता न्हीसे स्वर्गग्याम “तोर खउ” भिबा घेन काइ थे:जी। जमाहेन्से थेनीगदेला शत्रुगदेसे च्यान च्यानान थेन्नी खसु न्हङग्याम तबान स्वर्गरी निजी।*

१३थेनोन धुइरी घेन सडगुल खसी शहरला भो च्युइला भो गिक दिमगदे नाश लजी। थे सडगुल खमा हजार

निस म्हिगदे सिजी। ओच्छे आसिबा म्हिगदेसे चा ल्हानान लोइसी स्वर्गरी धन्छ्याबा परमेश्वरदा मानदेन जयजयकार लजी।*

१४न्हीरेमला आपत विपत निसी जिन्जी। तर च्यागो, सोमरेमला आपत विपत योनान खला।

निसरेमला बिगुल

१५ओच्छे निसरेमला स्वर्गदूतसे हाडला बिगुल हाप्जी। थेसे हाडला बिगुल हाप्मा स्वर्गरी घेन घेन काइगदेरी चुहड् भिसी भिबान मुबा,

“दाहेन्से जम्बुलिङथोरी शासन लबा अधिकार यहाडला परमेश्वरदेन थेसे धम्बा थाबा पिन्बा ख्रीष्टलान हिन्ना।

थेसे सदनना लागिरी शासन लला।”*

१६जमाहेन्से परमेश्वरला डाच्छा हाड हाडला ठिरी चिबा थे बोगल गिकसे गोर बिल गन्बागदेसे परमेश्वरदा फ्या लसी जयजयकार लजी। १७ओच्छे थेनीगदेसे चुहड् भिसी भिजी,

“जम्मान भन्दा घेन परमप्रभु परमेश्वर, हाड डाच्छाएनोन मुबा ओच्छे दान्देनोन मुला।

हाडदा डन्ना ल्हानान धन्यवाद
मुला।

तिगदा भिसम हाडसे हाडला घेन
अधिकार किन्सी

शासन लबारी छ्याइबा मुला।

१८ यहुल यहुलला म्हिगदेदा[†] ल्हानान
बोमो खबा मुबा,

तर दाहेन्से हाडदाएनोन बोमो
खबा धुइ तबा मुला।

दाहेन्से सिबागदेला निसाफ लबा
धुइएनोन तबा मुला,

ओच्छे हाडसे हाडला गे लबा
अगमवक्तागदेदेन हाडला
म्हिगदे,

ओच्छे हाडदा मान लबा जजा
घेन जम्मान म्हिगदेदा

इनाम पिन्बा धुइएनोन तबा
मुला,

ओच्छे जम्बुलिङ नाश लबागदेदा
नाश लबा धुइएनोन तबा
मुला।”*

१९ जमाहेन्से स्वर्गरी मुबा
परमेश्वरला मन्दिर ठोङ्जी। ओच्छे
परमेश्वरसे लबा कबुल थान्बा
सन्दोस प्राङ्जी। जमाहेन्से तिप्लीङ
खसी गडङगुडुङ भिसी मु ठेङ्बा
थे:जी। ओच्छे सङ्गुल निसी घेन घेन
सेर्बा ताङ्जी।*

यूहन्नासे प्राङ्बा मिडम्हेमेदेन
अजिङ्गर

१२ जमाहेन्से डाइ स्वर्गरी
उदेकला चिनु गिक
प्राङ्जी। ओच्छे डाइ धिनी क्वान्बादेन
काङ धिरी लनी मुबा च्युक न्ही
सारला मुकुट कूबा मिडम्हेमे
गिक प्राङ्जी। २थे मिडम्हेमे जिउ
न्हीला मुबा, ओच्छे बेथा याङ्बासे
लमा थे क्रिङ्बान मुबा। ३ओच्छे
डाइ दो:सी स्वर्गरी उदेकला चिनु
गिक प्राङ्जी। च्यागो, गोर निस
थोबोदेन गोर च्युइ रु मुबा वाला
घेन अजिङ्गर गिक प्राङ्जी। थेसे
गोर निस मुकुट कूबा मुबा।* ४थे
अजिङ्गरला मे:से मुला सारगदे भो
सोम न्हङरी भो गिक सारदा पोप
लसी जम्बुलिङरी भ्याङ्जी। ओच्छे
कोला न्हमैछ्याम चतो:ला भिसी थे
अजिङ्गर कोला न्हबारी छ्याइबा
थे मिडम्हेमेला डामरी राप्सी चिजी।*
५थे मिडम्हेमेसे जम्बुलिङला जम्मान
यहुलला म्हिगदेदा फाइला कडीसे
शासन लबा भा गिक न्हजी। थे
कोलादा परमेश्वर मुबा ग्लारी थीसी
भोर्सी परमेश्वरला ठिरी थान्जी।*
६जमाहेन्से थे मिडम्हेमे तोङतोङबा

११:१८ “यहुल यहुलला म्हिगदे” भिबा चा अर्गु यहुलला म्हिगदे हिन्ना।

११:१८ भजन २:५; ११०:५; ११५:१३

११:१९ उन्बा ८:५; १६:१८-२१ १२:३ दानि ७:७

१२:४ दानि ८:१० १२:५ यशै ६६:७; भजन २:६

ग्लारी यार्जी। थेला लागिरी हजार
गिकसे ग्यार्जा न्हीसे बोगल सोम
धिनधोनाला लागिरी चबा थुडुबा
लगै भिसी परमेश्वरसे थेदा ग्ला गिक
ठीक लसी थान्बा मुबा।

७ ओच्छे स्वर्गरी लडाइ तजी।
मिखाएलदेन^१ थेला दूतगदेसे थे
अजिङ्गरदेन थेला दूतगदेदेन
छायाम लडाइ लजी। थेहङ् लसीन
अजिङ्गरदेन थेला दूतगदेसेनोन लडाइ
लजी।* ८ तर अजिङ्गरदेन थेला दूतगदे
भ्रेजी। जमाहेन्से थेनीगदेदा चिबाला
लागिरी स्वर्गरी ग्ला आतनी। ९ थे
अजिङ्गर चा दडबोला पुख्री हिन्ना।
थेला मिन शैतान हिन्ना, थेदा म्हडला
ग्लेएनोन भिमुला। थेसे जम्बुलिङला
जम्मान म्हिगदेदा न्होङ्ना लबा मुबा।
थेदेन थेला दूतगदेदान स्वर्गग्याम
जम्बुलिङरी भ्याङ्जी।* १० जमाहेन्से
डाइ स्वर्गरी घेन काइसे चुहङ् भिबा
थे:जी,

“दाहेन्से यहाङला परमेश्वरग्याम
यहाङसे याङ्बा थाबादेन
शक्ति
ओच्छे परमेश्वरला यहुल्सादेन
थेसे धम्बा थार्बा पिन्बा
ख्रीष्टला अधिकार उन्बा
मुला।

तिगदा भिसम यहाङला ज्योज्यो
आले नाना आडागदेदा
धिन म्हुननोन परमेश्वरला
डाच्छापट्टि दोष उन्बा
शैतानदा स्वर्गग्याम भ्याङ्बा
मुला।*

११ थार्बा पिन्बा ग्यु बोगोला कादेन
थेनीगदेसे पाङ्बा सत्य बचन
तबासे लमा
थेनीगदेसे थेदा ढाबा मुला।
ओच्छे हाङला ज्याननोन पिन्बारी
थेनीगदे तयार तबा मुबा।
१२ थेतबासेलमा एनीगदे स्वर्गदेन
स्वर्गरी मुबागदे जम्मान
ताङ्गो!
तर जम्बुलिङदेन समुन्द्ररी
मुबागदेदा गाते दुख तला!
तिगदा भिसम शैतानसे हाङ ल्हाना
आसो भिबा ताम था याङ्सी
थे ल्हानान बोमो खसी एनीगदे
मुबा ग्लारी खबा मुला।”

१३ थे अजिङ्गरसे हाङदा
जम्बुलिङरी भ्याङ्जी भिबा
ताम था याङ्सी थे भा न्हबा
म्रिङम्हेमेदा ताप्बारी छयाङ्जी।
१४ तर थे म्रिङम्हेमेदा तोडतोडबा
ग्लारी फ्याङ्सी निबाला लागिरी घेन
ग्वाइला भ्याप पिन्जी। थे तोडतोडबा

१२:७ “मिखाएल” भिबा चा घेन स्वर्गदूत हिन्ना, थे चा स्थान्दो स्वर्गदूतगदेला कप्तान
हिन्ना।

१२:७ दानि १०:१३, २१; १२:१; यहूदा ६ पद १२:६ उत्प ३:१; लूका १०:१८

१२:१० अय्यूब १:६-११; जक ३:१

ग्ला चा थे म्रिडम्हेमेदा अजिङ्गरग्याम सोम दिडसे ला दुधोना^१ जोगब तसी चिबाला लागिरीदेन चबा थुङ्बा लबाला लागिरी ठीक लसी थान्बा मुबा।^{*} १५ थे म्रिडम्हेमेदा भाल बाढीसे भोगै भिसी थे अजिङ्गरसे सुङ्ग्याम स्योङ हङ् लसी क्युङ पुङ्जी। १६ तर जम्बुलिङसे हाङला सुङ आँ लसी थे अजिङ्गरला सुङ्ग्याम थोन्बा स्योङ ग्लोङ्सी थे म्रिडम्हेमेदा जोगब लजी। १७ जमाहेन्से थे अजिङ्गर थे म्रिडम्हेमेदेन छ्याम भन ल्हानान बोमो खजी। ओच्छे परमेश्वरसे कुल्बा ताम ड्यान्बादेन येशूसे लोप्बा तामथोरी विश्वास लबा थे म्रिडम्हेमेला अर्गु सन्तानगदेदेन छ्याम लडाइ लबारी भ्रजी। १८ ओच्छे थे अजिङ्गर समुन्द्रला कुनीरी निसी राप्जी।

समुन्द्रग्याम थोन्सी खबा जन्तु

१३ जमाहेन्से डाइ लोङ्बा खबा जन्तु गिक समुन्द्रग्याम थोन्सी खबा म्राङ्जी। थे जन्तुला गोर च्युङ रुदेन गोर निस थोबो मुबा, ओच्छे थेला जम्मान रुरी गोर गिक गिक मुकुट मुबा। थेहङ् लसीन थेला जम्मान थोबोरी परमेश्वरदा बिरोध लबा आज्यबा मिन भ्रिबा मुबा। २ थे लोङ्बा खबा

जन्तु चितुवा हङ्बान मुबा। तर थेला काङ तहुमला हङ्बान मुबा ओच्छे सुङ चा च्यान्ना हङ्बान मुबा। थे अजिङ्गरसे हाङला शक्तिदेन हाङला ठि ओच्छे घेन अधिकार थे जन्तुदा पिन्जी।^{*} ३ थे लोङ्बा खबा जन्तुला थोबोगदे न्हङला थोबो गिकरी चा घेन पोर तबा हङ्बान म्राङ्मुबा, थे पोरसे लमा थे सिबारी छ्याइबा मुबा, तर थे पोर खम्जी। जमाहेन्से जम्बुलिङला जम्मान म्हिगदे उदेक तसी थे जन्तुला लिच्छा लिच्छा भ्रजी।^४ थे अजिङ्गरसे हाङला अधिकार थे लोङ्बा खबा जन्तुदा पिन्बा म्राङ्सी म्हिगदेसे थे अजिङ्गरदा तेन्जी। ओच्छे म्हिगदेसे “चु जन्तु हङ्बा अर्गु खाल मुला? चुदेन छ्याम खाल छेबारी खम्ला?” भिबान थे जन्तुदाएनोन तेन्जी।

^५ थे लोङ्बा खबा जन्तुदा परमेश्वरला बिरोध लबा ताम पाङ्पुङ्जी। ओच्छे थेदा तिग लइ म्हन्बा थेनोन लबारी बोगल न्हीसे ला न्हीधोना अधिकार पिन्जी।^{*} ६ थे लोङ्बा खबा जन्तुसे परमेश्वरला बिरोधरी ताम पाङ्जी। परमेश्वरला मिनदेन थे धन्छ्याबा ग्ला ओच्छे स्वर्गरी परमेश्वरदेन छ्याम चिबागदेला बिरोध लजी। ७ थे लोङ्बा खबा जन्तुदा परमेश्वरला म्हिगदेदेन लडाइ

१२:१४ ग्रीक बाइबल अन्धार सोम दिडसे ला दुधोना भिबा चा धुङ, धुङ्गदेदेन धुङ गडसल भिसी भिबा मुला।

१२:१४ दानि ७:२५; १२:७ १३:२ दानि ७:४-६ १३:५-६ दानि ७:८, २५; ११:३६

लसी ढाबारी खम्बा शक्ति पिन्बा मुबा।
 ओच्छे जम्मान वंशदेन म्हिगदे ओच्छे
 थरी थरीला ग्योङ्गदेदेन य्हुलगदेथोरी
 शासन लबा अधिकार पिन्बा मुबा।*
 ८ जम्बुलिङ स्होबा भन्दा डाच्छान
 जुकजुकधोनाला जुनीला किताबरी
 मिन आरेबा जम्बुलिङला जम्मान
 म्हिगदेसे थे लोङ्बा खबा जन्तुदा
 तेन्ना। थे किताब चा साइबा थार्बा
 पिन्बा ग्यु बोगोला मुबा।*

९ जुन म्हिदा ड्यान्बा सेम मुला,
 थेसे ड्यान्सी ज्यना लसी घोउ।
 १० खालै म्हिदा भयाल्खानरी
 भाङ्तो:बा मुसम
 थेदा भयाल्खानरी भाङ्नोन
 भाङ्ला।
 ओच्छे खालै म्हि तरवारग्याम
 सितो:बा मुसम
 थे तरवारग्यामसेन सिला।
 थेतबासेलमा परमेश्वरला म्हिगदेदेन
 छ्याम गाते नाखम्बा शक्तिदेन
 विश्वास ततो:ला भिबा ताम
 चुग्यामसेन था तला।*

जम्बुलिङग्याम थोन्बा जन्तु

११ ओच्छे डाइ जम्बुलिङग्याम
 थोन्सी खबा अर्गु लोङ्बा खबा जन्तु
 गिकएनोन म्राङ्जी। थे लोङ्बा खबा
 जन्तुला ग्युला हङ्बान रु न्ही मुबा।
 तर थेसे अजिङ्गरसे हङ् लसी ताम
 पाङ्मुबा। १२ चु लोङ्बा खबा जन्तुसे

समुन्द्रग्याम थोन्बा थे डाच्छाला
 लोङ्बा खबा जन्तुला लागिरी
 हाडला अधिकारग्याम जम्बुलिङला
 जम्मान म्हिगदेदा थे घेन पोर म्हाबा
 डाच्छाला लोङ्बा खबा जन्तुदा
 तेन्पुङ्जी। १३ जम्बुलिङग्याम थोन्बा
 थे लोङ्बा खबा जन्तुसे जम्मान
 म्हिला डाच्छा मुग्याम जम्बुलिङरी मे
 ताइना लसी घेन घेन चिनुगदे उन्जी।
 १४ थेसे थे समुन्द्रग्याम थोन्बा लोङ्बा
 खबा जन्तुला लागिरी उदेकला
 चिनुगदेग्याम जम्बुलिङला जम्मान
 म्हिगदेदा फसब लजी। ओच्छे
 तरवारसे थासी घेन पोर तसीनोन
 सोबा थे लोङ्बा खबा जन्तुदा मान
 लबाला लागिरी थेला मूर्ति गिक
 स्होउ भिसी जम्बुलिङग्याम थोन्बा थे
 लोङ्बा खबा जन्तुसे जम्मान म्हिगदेदा
 कुल्जी। १५ थे जम्बुलिङग्याम थोन्बा
 जन्तुदा थे डाच्छा थोन्बा जन्तुला
 मूर्तिसे ताम पाङ्खम्गौ ओच्छे थेला
 मूर्तिदा आतेन्बा म्हिगदेदा साइगै
 भिसी थे मूर्तिरी सा युबा अधिकार
 पिन्जी। १६ ओच्छे थे जम्बुलिङग्याम
 थोन्बा जन्तुसे जजा मुसै घेन मुसै,
 फ्युकपो मुसै प्राङ्बो मुसै, नोकर
 हिन्सै नोकर आहिन्सै जम्मादान
 हाड हाडला दाहिने यारी तसै डोरी
 तसै चिनु लपुङ्जी। १७ थे चिनु
 आलबा म्हिगदेसे चा तिगै स्हे ग्लुबा
 चूङ्बा लआम्याङ्मुबा। थे चिनु चा

समुन्द्रग्याम थोन्बा जन्तुला मिन
अथवा थेला मिनदा घोबा अङ्क
हिन्ना।

१८ चु ताम घोबाला लागिरी ज्ञान
बुद्धि तोःला, जुन म्हिदेन घोखम्बा
शक्ति मुला थेसे थे समुन्द्रग्याम थोन्बा
जन्तुला अङ्कला अर्थ घोखम्बौ। तिगदा
भिसम थे अङ्क म्हि गिकला मिनग्याम
थान्बा हिन्ना। थे अङ्क चा ६६६ हिन्ना।

थार्बा याङ्बागदेसे गोबा व्हाइ

१४ दोःसी डाइ च्यामा सियोन
गडरी थार्बा पिन्बा ग्यु
बोगो राप्सी चिबा मुबा। थेदेन छ्याम
लाख गिकसे बोगल न्हीसे हजार बिल
म्हिगदे मुबा। थे म्हिगदेला डोरी थेदेन
थेला आबाला मिन भिबा मुबा।*
२ ओच्छे डाइ स्वर्गग्याम छांगारी
क्युइ ताइबा हङ्बादेन मु गुडुङ्बा
हङ्बान आवाज थेःजी। थे आवाज
चा ल्हानान वीणा भिबा बाजा ह्याप्मा
थोन्बा आवाज हङ्बान थेःमुबा। ३ थे
लाख गिकसे बोगल न्हीसे हजार बिल
म्हिगदे चा मुल ठिदेन गोर बिल छोन्बो
जन्तु ओच्छे गन्बागदेला डाच्छापट्टि
राप्सी छार व्हाइ गिक गोजी। चु व्हाइ
चा थेनीगदेसे जे था याङ्बारी खम्मुबा।
तिगदा भिसम थेनीगदेदा जे सय फासी
जम्बुलिङग्याम तेःबा मुबा। ४ थेनीगदे
खाले मिङकोलागदेदेन छ्याम
आब्रेल्बा कन्याकेटा दोसी चिबा

मुबा। थेनीगदे थार्बा पिन्बा ग्यु बोगोसे
कुल्बा अन्छार भ्रमुबा। जम्बुलिङला
म्हिगदे न्हङ्ग्याम थेनीगदेदा जे सय
फासी तेःबा मुबा ओच्छे परमेश्वरदेन
थार्बा पिन्बा ग्यु बोगोला लागिरी
जम्मान भन्दा डाच्छा फुल्बा भेटी
थेनीगदेन मुबा। ५ थेनीगदेसे लुसीला
ताम तिगैनोन लबा आरेबा, ओच्छे
थेनीगदे तिगै दोष आरेबा म्हि मुबा।*

गोर सोम स्वर्गदूत

६ जमाहेन्से डाइ मुरी फ्याङ्बान लबा
स्थहान्दो स्वर्गदूत गिकदा म्राङ्जी। थे
जम्बुलिङरी मुबा जम्मान यहुल्साला
म्हिगदे, जम्मान वंशला म्हिगदेदेन थरी
थरीला ग्योइ पाङ्बा म्हिगदेदेन यहुल
यहुलला म्हिगदेदा जुकजुकधोनाला
जुनी पिन्बा समाचार थेःना लबारी खबा
मुबा। ७ थेसे घेन काइग्याम चुहङ् भिसी
भिजी, “परमेश्वर म्राङ्सी लोङ्गो,
ओच्छे थेदा मानदेन जयजयकार लउ।
तिगदा भिसम परमेश्वरसे जम्मान
म्हि यहुलला निसाफ लबा धुइ तसी
जिन्बा मुला। थेतबासेलमा स्वर्गदेन
जम्बुलिङ ओच्छे समुन्द्रदेन क्युइला
मुलगदे स्होबा परमेश्वरदा तेन्गो।”

८ ओच्छे स्थहान्दो स्वर्गदूत
गिकएनोन थेनोन स्वर्गदूतला लिच्छा
लिच्छा चुहङ् भिबान खजी, “थे घेन
बेबिलोन शहर नाश तबा मुला! हिन्ना
नाश तबा मुला। थेनोन शहरसे जम्मान

यहुल यहुलला म्हिगदेदा स्थहान्दोदेन
छ्याम ब्रैल्पुङ्सी निङगुसे ड्य्होइबा
हङ्गनोन तना लजी।”*

६थे स्वर्गदूत न्हीला लिच्छा लिच्छा
स्थहान्दो स्वर्गदूत गिकएनोन घ्रेन
काइरी चुहङ्ग भिबान खजी, “चुदे खालै
म्हिसे थे समुन्द्रग्याम थोन्बा जन्तुदेन
थेला मूर्तिदा तेन्सी डोरी अथवा यारी
थेला चिनु थान्जी भिसम, १०थेदाएनोन
परमेश्वरसे हाङला बोमोग्याम घ्रेन
सजाय पिन्ना, थेनीगदेदा परमेश्वरला
स्वर्गदूतगदेदेन थार्बा पिन्बा ग्यु
बोगोला डाच्छापट्टि मेदेन गन्धकरी
भ्याङ्सी सजाय पिन्ना।” * ११ओच्छे
थेनीगदेदा सजाय पिन्बा मेला म्युगु
सदन तोरपट्टि निला। जुन जुन म्हिसे
थे समुन्द्रग्याम थोन्बा जन्तुदेन थेला
मूर्तिदा तेन्सी थेला मिन मुबा चिनु
थान्ना थेनीगदेसे धिन म्हुननोन सजाय
नातो:ला।” * १२परमेश्वरसे कुल्बा
ताम ड्यान्बादेन येशूदा विश्वास लबा
परमेश्वरला म्हिगदे चा खाहङ्ग लसी
नासी विश्वास आखलाना चितो:ला
भिबा ताम चुग्यामसेन था तला।

१३ओच्छे डाइ स्वर्गग्याम चुहङ्ग
भिबा काइ थे:जी, “चु भिसी थान्गो,
दाहेन्से प्रभुदा विश्वास लसी सिबागदे
परमेश्वरग्याम मोलम याङ्बागदे
हिन्ना।” परमेश्वरला आत्मासे चुहङ्ग

भिसी सुङ्बा मुला, “हिन्ना, थेनीगदे
हाङ हाङसे लबा गेदेन दुखग्याम
फेबा मुला ओच्छे थेनीगदेसे लबा गे
अन्छारला इनाम याङ्ला।

जम्बुलिङला बाली खन्बा धुइ

१४ओच्छे डाइ परमेश्वरसे पुइखबा
म्हि हङ्गबान म्हि गिक तार खसुथोरी
धन्छ्याबा म्हाङ्गी। थेसे म्हरला मुकुट
कूबा मुबा। थेला यारी छ्यार्बा हङ्सु
गिक मुबा। * १५जमाहेन्से परमेश्वरला
मन्दिर न्हङ्ग्याम स्थहान्दो स्वर्गदूत
गिक खसी खसुरी धन्छ्याबादा घ्रेन
काइसे चुहङ्ग भिसी भिजी, “हाङला
हङ्सुसे बाली खन्गो। तिगदा
भिसम जम्बुलिङला जम्मान बाली
खन्बा धुइ तसी जिन्बा मुला।” *
१६जमाहेन्से खसुथोरी धन्छ्याबासे
जम्बुलिङथोरी हाङला हङ्सु चलब
लसी जम्बुलिङला जम्मान बाली
खन्जी।

१७थेहङ्ग लसीन स्वर्गरी मुबा
परमेश्वरला मन्दिर न्हङ्ग्याम
स्थहान्दो स्वर्गदूत गिकएनोन मङ्ग्यार
खजी। थेदेन छ्यामएनोन छ्यार्बा
हङ्सु गिक मुबा। १८जमाहेन्से मेथोरी
अधिकार मुबा स्थहान्दो स्वर्गदूत गिक
धूप म्हाबा ग्लाग्याम थोन्जी। ओच्छे
हङ्सु थोबा स्वर्गदूतला छ्यार्बा

१४:८ यशै २१:६; यर्मि ५१:८; उन्बा १८:२

१४:१० यशै ५१:१७; उत्प १६:२४; इजि ३८:२२ १४:११ यशै ३४:१०

१४:१४ दानि ७:१३ १४:१५ योए ३:१३

हडसुसे जम्बुलिडला अडगुर थुउ,[†]
 तिग्दा भिसम जम्बुलिडला अडगुर
 मिन्सी जिन्बा मुला” भिसी घेन काइसे
 पाइजी। ^{१६}जमाहेन्से थे स्वर्गदूतसे
 जम्बुलिडथोरी हाडला हडसु चलब
 लसी जम्बुलिडला जम्मान अडगुर
 थुसी ग्ला गिकरी पोप लजी। ओच्छे
 थे अडगुरदा परमेश्वरसे सजाय पिन्बा
 कोलरी भ्याइजी। ^{२०}थे अडगुरदा
 शहरला मडग्यारपट्टि मुबा कोलरी
 म्हर्जी। थे कोलग्याम ओस्पन मिटर
 नाइसे गडसल नुप्बा[†] ओच्छे ग्यार्जा
 सोम किलोमिटर हेइबा काला स्योड
 थोन्बा मुबा।*

गोर निस स्वर्गदूतगदे

१५ डाइ स्वर्गरी उदेकला घेन
 अर्गु चिनु गिक म्राइजी।
 थेरी आपत विपत गिक गिक थोसी
 चिबा गोर निस स्वर्गदूतगदे मुबा।
 चु चा जम्मान भन्दा लिच्छाला
 आपत विपत मुबा। तिग्दा भिसम
 परमेश्वरसे पिन्बा जम्मान भन्दा
 लिच्छाला सजाय चुनोन मुबा।
^२डाइ डाला डाच्छापट्टि मेदेन सिसा
 दोइबा समुन्द्र हइबान स्हे म्राइजी।
 ओच्छे समुन्द्रग्याम थोन्बा जन्तुदेन
 थेला मूर्ति ओच्छे थेला मिनग्याम

थान्बा अङ्कथोरी ढाबागदे जम्मादान
 म्राइजी। थेनीगदे हाड हाडला यारी
 परमेश्वरसे पिन्बा वीणा थोसी थे
 समुन्द्रला कुनीरी राप्सी चिबा मुबा।
^३थेनीगदेसे चुहड् भिसी परमेश्वरदा
 तेन्बा म्हि मोशादेन

थार्बा पिन्बा ग्यु बोगोला व्हाइ

गोबान मुबा,

“परमप्रभु परमेश्वर हाड जम्मान

भन्दा घेन हिन्ना,

हाडला गे ल्हानान घेनदेन

उदेकला मुला,

ओच्छे जम्बुलिडला जम्मान

य्हुलला म्हिगदेथोरी

सदन शासन लबा ग्ले हाडनोन

हिन्ना,

हाडसे लबा गेगदे सत्यदेन ठीक

मुला।*

^४परमप्रभु हाड म्राइसी आलोइबा

म्हि खाल मुला?

ओच्छे हाडदा मान लसी

जयजयकार आलबा म्हि खाल

मुला?

तिग्दा भिसम हाड जे जम्मान

भन्दा चोखो मुला।

जम्मान य्हुलला म्हिगदेसे हाडदा

तेन्ना,

तिग्दा भिसम हाडसे ठीक निसाफ

१४:१८ चु पदरी “अडगुर” भिबा चा परमेश्वरदा विश्वास आलबा म्हिगदे हिन्ना।

१४:२० मिटर नाइसे गडसल नुप्बा भिबा चा ग्रीक बाइबल अन्छार सहेन्से दप्पा ताला सुडधोना दोमुबा।

१४:२० यशै ६३:३; विल १:१५; उन्बा १६:१५ १५:३ प्रस्था १५:१

लबा जम्मासेन म्राड्बा
मुला।”*

५ जमाहेन्से डाइ स्वर्गरी परमेश्वर-
ला मन्दिर ठोड्बा म्राड्जी, ओच्छे
मन्दिर न्हडला जम्मान भन्दा चोखो
ग्लाएनोन म्राड्जी।* ६ थे मन्दिर
न्हडग्याम गोर गिक गिक आपत
विपत थोबा गोर निस स्वर्गदूतगदे
थोन्सी खजी। थेनीगदेसे सफादेन
यहाल यहालबा क्वान क्वान्बा मुबा,
ओच्छे कुरी म्हरला फित्ता खीबा
मुबा। ७ जमाहेन्से थे गोर बिल
छोन्बो जन्तुगदे न्हडला गिकसे थे
गोर निस स्वर्गदूतगदेदा सदन सोबा
परमेश्वरला बोमोसे प्लिड्बा गोर
गिक गिक म्हरला खोरे पिन्जी।
८ ओच्छे परमेश्वरला यहालदेन
शक्तिग्याम थोन्बा म्युगुसे मन्दिर
प्लिड्जी। जमाहेन्से थे गोर निस
स्वर्गदूतगदेसे थोबा गोर निस आपत
विपत आजिन्तेधोना खालैनोन
मन्दिर न्हडरी वाड्बारी आखम्नी।*

परमेश्वरला बोमोसे प्लिड्बा गोर
निस खोरे

१६ जमाहेन्से डाइ परमेश्वरला
मन्दिर न्हडग्याम घेन
काइरी थे गोर निस स्वर्गदूतगदेदा
चुहङ् भिसी कुल्बा थे:जी, “एनीगदे

निउ, ओच्छे परमेश्वरला बोमोसे
प्लिड्बा थे गोर निस खोरे
जम्बुलिङथोरी ल्हूगो।”

२ जमाहेन्से स्वर्गदूत गिक
निसी हाडदेन छ्याम मुबा खोरे
जम्बुलिङथोरी ल्हूजी। थेतबासेलमा
थे समुन्द्रग्याम थोन्बा जन्तुला चिनु
थान्बादेन थेला मूर्तिदा तेन्बा म्हिगदेदा
ल्हानान स्हु खबादेन नइबा खबा पोर
थोन्जी।*

३ ओच्छे न्हीरेमला स्वर्गदूतसे
हाडदेन छ्याम मुबा खोरे समुन्दरी
ल्हूजी। ओच्छे समुन्द्रला क्युइ
सिबा म्हिला का हड्बान दोजी।
थेतबासेलमा समुन्दरी मुबा जम्मान
छोन्बो जन्तुगदे सिजी।

४ ओच्छे सोमरेमला स्वर्गदूतसे
हाडदेन छ्याम मुबा खोरे स्योडदेन
क्युइला मुहानरी ल्हूजी। जमाहेन्से
जम्मान क्युइ का दोजी।* ५ जमाहेन्से
डाइ क्युइला अधिकार याड्बा
स्वर्गदूतसे चुहङ् भिबान लबा
थे:जी, “हाड तिगै दोष आरेबा
परमेश्वर हिन्ना, हाड डाच्छाएनोन
मुबा, दान्देनोन मुला। हाडसे लबा
निसाफ ठीक मुला। ६ हाडसे पुइखबा
अगमवक्तागदेदेन हाडदा तेन्बा
म्हिगदेदा थेनीगदेसे साइबासे लमा
हाडसे थेनीगदेदा कानोन थुङ्पुङ्सी

१५:४ यर्मि १०:७; भजन ८६:६ १५:५ प्रस्था ३८:२१

१५:८ प्रस्था ४०:३४; १ राजा ८:१-११; २ इति ५:१३-१४ यशै ६:४ १६:२ प्रस्था ६:१०

१६:४ प्रस्था ७:१७-२१; भजन ७८:४४

थेनीगदेसे याङ्तोःबा सजाय पिन्बा मुला।” ७जमाहेन्से डाइ धूप म्बा ग्लाग्याम चुहङ् भिबा थेःजी, “परमप्रभु परमेश्वर, हाङ जम्मान भन्दा घेन परमेश्वर हिन्ना, हाङसे लबा निसाफ सत्यदेन ठीक मुला।”

८जमाहेन्से ब्लिरेमला स्वर्गदूतसे हाङदेन छ्याम मुबा खोरे धिनीरी लहूजी। ओच्छे धिनीग्याम थोन्बा मेला हङ्बा रापसे म्हिगदेदा क्रोना लपुङ्जी। ९मेला हङ्बा धिनीला रापसे म्हिगदे क्रोजी, ओच्छे थे आपत विपतगदेदा तहरी थान्बा परमेश्वरदा म्हिगदेसे केःजी। तर थेनीगदे हाङ हाङला पाप रूलासी परमेश्वरपट्टि दोःसी परमेश्वरदा मानदेन जयजयकार आलनी।

१०डारेमला स्वर्गदूतसे हाङदेन छ्याम मुबा खोरे थे समुन्द्रग्याम थोन्बा जन्तुला ११ ठिथोरी लहूजी। ओच्छे थेला यहुल्सा धोपधोप तजी। जमाहेन्से थेनीगदेसे स्हु स्हेरसे लमा स्वा केजी। * ११थेनीगदेदा तबा स्हु स्हेरदेन पोरसे लमा थेनीगदेसे स्वर्गरी धन्छ्याबा परमेश्वरदा बिरोध लजी। तर थेनीगदे हाङ हाङसे लबा आज्यबा गे रूलासी परमेश्वरपट्टि आदोःनी।

१२हुरेमला स्वर्गदूतसे हाङदेन छ्याम मुबा खोरे यूफ्रेटिस भिबा घेन स्योडरी लहूजी। जमाहेन्से स्यारग्याम खबा ग्लेगदेदेन थेला सिपाहीगदेदा भ्रबारी ग्याम तगै भिसी थे स्योड खर्जी। * १३जमाहेन्से डाइ अजिङ्गरदेन थे जम्बुलिङ्ग्याम थोन्बा जन्तु ओच्छे लुसीला ताम पाङ्बा अगमवक्ताला सुङ्ग्याम भाल्बा हङ्बान गोर सोम म्हङ्गदे थोन्बा म्हाङ्जी। १४थे आज्यबा आत्मागदे चा उदेकला चिनुगदे उन्बा म्हङ्गदे हिन्ना। जम्मान भन्दा घेन परमेश्वरसे निसाफ लबा धिनकुनु थे आत्मागदे परमेश्वरदेन छ्याम लडाइ लबाला लागिरी जम्बुलिङ्गला जम्मान ग्लेगदेदा पोप लबारी निला।

१५“च्यागो, डा य्हो खबा हङ् लसी खालैदा था आयाङ्ना लसी खला। जुन म्हि छोर्सी चिसी हाङला क्वान हाङदेन छ्याम थान्ना थे परमेश्वरग्याम मोलम याङ्बा म्हि हिन्ना। थेहङ् लसी हाङला क्वान जोगब लसी थान्बा म्हि लिगन्डी भ्रआतोः। ओच्छे म्हिगदेला डाच्छापट्टि पेःआतोः।” १६ओच्छे थे म्हङ्गदेसे जम्बुलिङ्गला जम्मान ग्लेगदेदा ग्ला गिकरी पोप लजी। थे

१६:१० थे समुन्द्रग्याम थोन्बा जन्तु चा शैतानना ग्ले हिन्ना।

१६:१५ चु पदला ताम प्रभु येशूसे सुङ्बा हिन्ना, (मती २४:४३-४४; लूका १२:३६-४०; उन्बा ३:३ स्हीगो)।

१६:१० प्रस्था १०:२१ १६:१२ यशै ११:१५

ग्लादा हिब्रू ग्योइरी आर-मागेड्डोन†
भिमुबा।*

१७ ओच्छे निसरेमला स्वर्गदूतसे
हाडदेन छ्याम मुबा खोरे लाबाथोरी
ल्हूजी। जमाहेन्से मन्दिरला ठिग्याम
“दाहेन्से जिन्जी” भिबा घेन काइ
खजी। १८ जमाहेन्से तिप्लीड खबादेन
मु ठेड्बा ओच्छे घेन घेन काइ खजी,
ओच्छे घेन सडगुल खजी। थेहड्बा
घेन सडगुल मी जम्बुलिडरी म्हि
ठुड्बा धिनहेन्से दान्देधोना खाइमै
खबा आरेबा। १९ जमाहेन्से थे घेन
बेबिलोन भिबा शहर भो सोम तसी
फेजी, ओच्छे जम्मान यहुल्साला
शहरगदे नाश तजी। परमेश्वरसे थे
घेन शहर बेबिलोनला पाप ढन्जी,
ओच्छे हाडला घेन बोमोग्याम थे
शहरदा सजाय पिन्जी।* २० जमाहेन्से
समुन्द्रला गुडरी मुबा जम्मान
ग्लागदेदेन जम्मान गडगदे म्हाजी।
२१ ओच्छे मुग्याम म्हिगदेथोरी ओस्पन
बोगल न्ही किलोला सेर्बा ताइबारी
छ्याइजी। चुहड्बा सेर्बा ताइसी
आपत विपत तबासे लमा म्हिगदेसे
परमेश्वरदा केःबारी छ्याइजी। तिगदा
भिसम चुल्हानान लोड्बा खबा आपत
विपत मुबा।

ल्हानान बेश्या गे लसी भ्रबा मिडम्हेमे

१७ थे गोर निस खोरे थोबा
गोर निस स्वर्गदूतगदे
न्हडला गिक डा मुबा ग्लारी खसी
डादा चुहड् भिजी, “चुरी खउ, डाइ
एदा ल्हानान स्योडगदेला कुनीरी
चिबा जम्मासेन डोसेबा बेश्या
मिडम्हेमेसे याड्बा सजाय उन्ना। थे
बेश्या मिडम्हेमे ल्हानान स्योडगदेला
कुनीरी मुबा घेन बेबिलोन शहर
हिन्ना।* २ जम्बुलिडला ग्लेगदे थे
बेश्या मिडम्हेमेदेन छ्याम ब्रेल्बा
मुला। ओच्छे जम्बुलिडला म्हिगदे
थेदेन छ्याम ब्रेल्सी अडगुरला निडगुसे
ड्य्होइबा हड्बोन तबा मुला।*
३ जमाहेन्से डा परमेश्वरला आत्मासे
प्लिड्जी। ओच्छे थे आत्मारी
स्वर्गदूतसे डादा तोडतोडबा ग्लारी
भोर्जी। थेरी डाइ वाला जन्तुथोरी†
क्रेःबा मिडम्हेमे गिक म्हाड्जी। थे
जन्तुला गोर निस थोबो मुबा ओच्छे
गोर च्युइ रु मुबा। थे जन्तुला जिउ
नाडनोन परमेश्वरदा बिरोध लबा
मिनगदे भिबा मुबा।* ४ थे मिडम्हेमेसे
चा वाला वाला पिडगैदेन वाला

१६:१६ “आर-मागेड्डोन” भिबा चा मेगोड्डो भिबा गड हिन्ना। ओन्मा थे गडरी ल्हानान लडाइ
तबा मुबा।

१७:३ वाला जन्तुदेन समुन्द्रग्याम थोन्बा लोड्बा खबा जन्तु ओस्पन तखम्ला। उन्बा
१३:१ स्हीगो।

१६:१६ २ राजा २३:२६; न्याय ५:१६; जक १२:११ १६:१६ यशै ५१:१७

१७:१ यर्मि ५१:१३ १७:२ यशै २३:१७; यर्मि ५१:७ १७:३ उन्बा १३:१

क्वान क्वान्बा मुबा। ओच्छे म्हर, रत्नदेन मोतीगदे क्वान्सी ज्योबा मुबा। थेसे हाडला यारी म्हरला खोरे गिक थोबा मुबा। थे खोरे चा थेसे लबा नइबा तामदेन थे स्थान्दोदेन छ्याम ब्रेल्सी भ्रबा नइबा खबा तामगदेसे प्लिङ्बा मुबा।* ५थे भ्रिडम्हेमेला डोरी, “जम्बुलिङला बेश्यागदेदेन नइबा खबा तामगदेला आमा घ्रेन बेबिलोन शहर” भिसी म्हिसे था आयाङ्बा मिन गिक भ्रिबा मुबा। ६ओच्छे डाइ थे भ्रिडम्हेमे परमेश्वरला म्हिगदेदेन येशूला लागिरी हाडला ज्याननोन पिन्बा म्हिगदेला का थुङ्सी ड्य्होइबा म्राङ्जी।

थे भ्रिडम्हेमेदा म्राङ्सी डा ल्हानान उदेक तजी। ७जमाहेन्से थे स्वर्गदूतसे डादा चुहङ् भिजी, “ए तिग्दा उदेक म्हन्बा? थे भ्रिडम्हेमेदेन थेदा पुइबा गोर निस थोबादेन गोर च्युइ रु मुबा जन्तुला बारेरी म्हिसे था आयाङ्बा ताम डाइ एदा पाङ्ला। ८एसे म्राङ्बा थे जन्तु डाच्छा मुबा, तर दान्दे आरे। सदनना लागिरी नाश तबारी थे ल्हानान नुप्बा व्हाङ्ग्याम तोर खबारी छ्याइबा मुला। जम्बुलिङ छ्यामाहेन्से जुकजुकधोनाला जुनीला किताबरी मिन आभ्रिबा जम्बुलिङला म्हिगदे थे जन्तुदा म्राङ्सी उदेक म्हन्ना। तिग्दा भिसम थे जन्तु डाच्छा

मुबा, दान्दे सिसी जिन्बा मुला। तर थे दोःसी सोला।* ९

९“चु ताम घोबारी ज्ञान बुद्धि तोःला। थे जन्तुला गोर निस थोबो चा थे भ्रिडम्हेमे चिबा गङ निस हिन्ना। १०थे गोर निस ग्लेगदेएनोन हिन्ना, थेनीगदे न्हङरी गोर डा ग्लेगदे नाश तसी जिन्जी, गिक चा दान्देधोना शासन लबान मुला। ओच्छे स्थान्दो गिक चा अभ् खबा आरे। थे खमाहेन्से ला न्ही सोमला लागिरी जे थेसे शासन लला। ११थे जन्तु डाच्छा सोबान मुबा, तर दान्दे सिसी जिन्बा मुला। थे जन्तु चा भ्रेःरेमला ग्ले हिन्ना। थे जन्तुएनोन गोर निस ग्लेगदे न्हङला ग्ले गिक हिन्ना। तसैनोन थे नाश तला।

१२“एसे म्राङ्बा थे गोर च्युइ रु चा ग्ले च्युइ हिन्ना। तर थेनीगदेसे दान्देधोना शासन लम्पाङ्बा आरे। थेनीगदेसे थे जन्तुदेन छ्याम तिगै धिनना लागिरी शासन लम्पाङ्गला।* १३थे ग्लेगदेला सेम गिकनोन मुला। थेतबासेलमा थेनीगदेसे हाड हाडला शक्तिदेन अधिकार थे जन्तुदा जिम्मा पिन्ना। १४थेनीगदेसे थार्बा पिन्बा ग्यु बोगोला बिरोध लसी लडाइ लला। तर थार्बा पिन्बा ग्यु बोगोसे थेनीगदेशोरी ढाला। तिग्दा भिसम थे प्रभुगदेला प्रभु ओच्छे ग्लेगदेलाएनोन ग्ले हिन्ना। थेदेन छ्याम मुबागदे चा

थेसे ड्योइबागदेदेन धम्बागदे ओच्छे
थेदा विश्वास लबागदे हिन्ना।”

१५ थे स्वर्गदूतसे डादा दोःसी चुहङ् भिसी पाङ्जी, “एसे म्राङ्बा थे बेश्या चिबा स्योङ्गदे चा यहुल यहुलदेन यहुल्सा ओच्छे थरी थरीला ग्योइ पाङ्बा म्हिगदे हिन्ना। १६ एसे म्राङ्बा गोर च्युइ रुदेन थे वाला जन्तुसे थे बेश्यादा हेला लला। ओच्छे थेदेन छ्याम मुबा जम्मान स्हे ब्यन्सी थेदा लिगन्डीन लसी थेला स्या चला। ओच्छे थेला नखुगदे मेसे खाङ्सी नाश लला। १७ तिग्दा भिसम थेनीगदेदा परमेश्वरसे हाङ्से म्हन्बा अन्छार पूरा लबा सेम पिन्बा मुबा। थेतबासेलमा परमेश्वरसे सुङ्बा बचन पूरा आततेधोना थेनीगदे सेम गिकलान तसी हाङ्से शासन लबा शक्तिदेन अधिकार थे लोङ्बा खबा जन्तुदा पिन्जी। १८ एसे म्राङ्बा थे भ्रिडम्हेमे चा जम्बुलिङ्गला ग्लेगदेथोरी शासन लबा घेन शहर हिन्ना।”

बेबिलोन शहर नाश तबा

१८ जमाहेन्से डाइ स्थान्दो स्वर्गदूत गिक स्वर्गग्याम मार फाप्बान लबा म्राङ्जी। थेदेन छ्याम घेन अधिकार मुबा। ओच्छे थेला यहालदेन शक्तिसे लमा जम्बुलिङ्ग नाङ्गोन यहाल यहाल तजी। २ थे

स्वर्गदूतसे घेन काइरी चुहङ् भिसी भिजी,

“थे शहर नाश तजी! थे घेन शहर बेबिलोन नाश तजी,
थे घेन शहर शैतानदेन थेला दूतगदे चिबा दिम दोबा मुला,
ओच्छे जम्मान नङ्बा आत्मागदेदेन चरागदे चिबा ग्ला दोजी।”*

३ तिग्दा भिसम स्थान्दोदेन छ्याम ब्रेल्सी भ्रबा थेला आज्यबा गेसे लमा

जम्मान यहुलला म्हिगदे अङ्गुरला निङ्गुसे ड्य्होइबा हङ्गोन तबा मुला।

ओच्छे जम्बुलिङ्गला ग्लेगदे थेदेन छ्याम ब्रेल्बा मुला,
थेला थेहङ्बा ब्रेल्सी भ्रबा सेमसे लमा जम्बुलिङ्गला व्यापारीगदे फ्युकपो दोबा मुला।”*

४ जमाहेन्से डाइ स्वर्गग्याम चुहङ् भिबान लबा अर्गु काइ थेःजी,

“डाला म्हिगदे, एनीगदे थे ग्लाग्याम थोन्सी खउ।
आहिन्सम थेसे लबा पापरी एनीगदे एनोन परब तला,
ओच्छे थेसे याङ्बा सजाय एनीगदेसेनोन नातोःला।”*

१८:२ यशै १३:२१; २१:६; यर्मि ५०:३६; ५१:८; उन्बा १४:८

१८:३ यशै २३:१७; यर्मि ५१:५१:७ १८:४ यशै ४८:२०; यर्मि ५०:८; ५१:६, ४५

५ तिग्दा भिसम थेसे पापथोरी पाप
लबासे लमा थेला नइबा गेगदे
स्वर्गधोनान धोबा मुला।
ओच्छे परमेश्वरसे थेसे लबा
आज्यबा गेगदे ढन्बा मुला।*

६ थेसे एनीगदेदा तिग लबा मुला,
थेदाएनोन एनीगदेसे थेहङ्गोन
लउ।
ओच्छे थेसे जुन गे लबा मुला
एनीगदेसे थेदा थे भन्दा दोब्बर
नाङ फागो।
थेसे एनीगदेला लागिरी जुन स्हे
दोङ्गसी खोरेरी ठीक लबा मुबा
थे भन्दा ल्हाना खरो स्हे
एनीगदेसे थेदा पिन्गो।*

७ थेसे मोजमजा लसी जति मान
याङ्बा मुला,
ओतेन थेदा दुखदेन सुर्दा पिन्गो।
तिग्दा भिसम थेसे घमण्ड लसी
सेम न्हङ न्हङरी चुहङ्गु भिसी
पाङ्गमुला।
‘डा ग्लेस्या दोसी चिबा मुला,
डा हेम्बो सिबा मिङम्हेमे
आहिन।
थेतबासेलमा डाइ खाइमै सुर्दा
लआतो:।’*

८ थेतबासेलमा तिरेरीन थेथोरी
कालदेन सुर्दा ओच्छे रोगदेन
अनिकाल खला।
ओच्छे थेदा मेसे खाङ्गला,

तिग्दा भिसम थेला निसाफ लबा
परमप्रभु परमेश्वर
शक्तिशाली मुला।”

९ थेदेन छ्याम ब्रेल्बादेन मोजमजा
लसी चिबा जम्बुलिङला ग्लेगदे
थेदा क्रोबा मेला म्युगु म्राङ्गसी क्राबा
क्रिङ्गु लला। १० थेदा पिन्बा सजाय
नाआतो:गै भिसी थेनीगदे लोङ्गसी
थारेङ्गोन राप्सी चुहङ्गु भिजी,
“अम्मै गाते आज्यबा ताम,
परमेश्वरग्याम सजाय याङ्गु घेन
शक्तिशाली बेबिलोन शहर,
एसे लबा आज्यबा गेसे लमा ए
छिन्नङरीन नाश तबा मुला।”*

११ जम्बुलिङला व्यापारीगदे थेला
लागिरी क्राबा क्रिङ्गु लला, तिग्दा
भिसम थेनीगदेसे लबा व्यापारला
सामानगदे दो:सी खालैसेन आग्लु।
१२ म्हर, म्हुङ, रत्न, मोतीदेन मलमलला
क्वानगदे वाला वाला पिङ्गु छोनना
क्वानगदे, रेशमला क्वानगदे, वाला
क्वानगदे, जम्मान खाल्ला बास्ना
खबा सिङ्ग, हात्तीला स्वाग्याम स्होबा
जम्मान स्हेगदे, ल्हानान महङ्गो जम्मान
सिङ्ग, काँसग्याम स्होबा स्हेगदे,
फाङ्ग्याम स्होबा स्हेगदे, ओच्छे
सिङ्गमरमरग्याम स्होबा स्हेगदे,
१३ सिङ्काउली, मसला, बास्ना
खबा धूप, मूर्, तार धूप, अङ्गुरला
निङ्गु, छ्युगु, ब्रा, ग्वा, म्हे, मुङ्ग,

ग्युगदे, तागदे, रथगदे, नोकरगदेदेन
लडाइरी भ्रेबा म्हिगदेदाएनोन खालैसेन
आग्लु।*

१४थे व्यापारीगदेसे थेदा चुहङ्
भिसी भिजी, “बेबिलोन, एला सेमसे
म्हन्बा जम्मान स्हेगदे एग्याम ब्यन्बा
मुला। ओच्छे एला धन सम्पत्तिदेन
जम्मान भक्भक्का स्हेगदे नाश तसी
जिन्बा मुला। दोःसी एसे थे जम्मान
स्हे खाइमै आयाङ्। १५थे घेन शहररी
व्यापार लसी धनी तबा व्यापारीगदे
थेदा पिन्बा घेन सजाय म्राङ्सी लोङ्सी
थारेडनोन राप्सी चिला। ओच्छे चुहङ्
भिबान क्राबा क्रिङ्बा लला,*

१६“अम्मै गाते आज्यबा ताम,

मलमलला क्वान, वाला वाला
पिडगैदेन वाला क्वान क्वान्बा
ओच्छे म्हरदेन रत्न ओच्छे
मोतीगदे क्वान्सी ज्योबा मुबा।

१७तिगदा भिसम छिन्नडरीन एला
जम्मान धन सम्पत्ति नाश तबा
मुला।”

जम्मान पानी जहाजला कप्तानदेन
पानी जहाजरी भ्रेबा म्हिगदे ओच्छे
पानी जहाज चलब लबा म्हिगदेदेन
समुन्द्रग्याम व्यापार लबा म्हिगदे
थारेडनोन राप्सी चिजी।* १८ओच्छे
थे घेन शहर क्रोसी थोन्बा म्युगु
म्राङ्सी, “चुहङ्बा घेन शहर हङ्बा

अर्गु खजिबै शहर आरेबा” भिसी
क्रिङ्जी। १९थेनीगदेसे हाङ हाङला
थोबोरी धुलु युसी चुहङ् भिबान
क्रिङ्जी,

“अम्मै गाते आज्यबा ताम,
थेरी मुबा धन सम्पत्तिग्याम पानी
जहाजला धनीगदे फ्युकपो
दोबा मुबा।
तर थे शहर छिन्नडरीन क्रोसी
नाश तजी।*

२०स्वर्गरी मुबागदे, थे नाश तबासे
लमा एनीगदे ताङ्गो!
परमेश्वरला म्हिगदे, मुल
चेलागदेदेन अगमवक्तागदे,
एनीगदे जम्मान ताङ्गो।

तिगदा भिसम थेसे एनीगदेदा
अन्याय लबासे लमा
परमेश्वरसे थेदा सजाय पिन्बा
मुला।”*

२१जमाहेन्से शक्तिशाली स्वर्गदूत
गिकसे हान्दा हङ्बान घेन युङ्बा
गिक थीसी चुहङ् भिबान थे युङ्बा
समुन्द्ररी भ्याङ्जी,

“थे घेन शहर बेबिलोनदाएनोन
चुहङ् लसीन भ्याङ्ला,
ओच्छे थेदा दोःसी खाइमै
आम्राङ्।*

२२थेरी वीणादेन बाँसुरी ओच्छे
बिगुलदेन

व्हाइ गोबागदेला काइ

थे:आम्याङ्।

थेरी जम्मान खाल्ला बुट्टा स्टेड्बा

म्हिगदेएनोन खाइमै आस्याप।

ओच्छे थेरी हान्दा ड्यबाएनोन

खाइमै थे:आम्याङ्।*

२३ थेरी खाइमै नाडसल आम्रा।

ओच्छे थेरी म्हाछारदेन

चाडछारला काइएनोन खाइमै

थे:आम्याङ्।

तिगदा भिसम एला व्यापारीगदे

जम्बुलिङला घेन घेन म्हिगदे

मुबा।

ओच्छे एला तन्त्रमन्त्रसे य्हल

य्हलला म्हिगदेदा ठगब लबा

मुबा।*

२४ थे शहररीन अगमवक्तागदे,

परमेश्वरला म्हिगदेदेन

जम्बुलिङरी साइबा जम्मान

म्हिगदेला का स्याप्बा

मुबा।”*

स्वर्गरी परमेश्वरला जयजयकार

लबा

१६ जमाहेन्से डाइ स्वर्गरी
ल्हानान म्हिगदेसे घेन

काइरी चुहङ् भिसी क्रिङ्बा थे:जी,

“परमेश्वरदा जयजयकार तगै!

थार्बा पिन्बादेन मान ओच्छे शक्ति

य्हाङला परमेश्वरलान हिन्ना।

२ तिगदा भिसम परमेश्वरसे लबा

निसाफ सत्यदेन ठीक मुला।

स्थान्दोदेन छ्याम ब्रेल्सी

जम्बुलिङ नाडलान म्हिगदेदा

न्होङ्ना लबा थे घेन बेश्यादा

परमेश्वरसे निसाफ लबा

मुला।

ओच्छे ह्वाङला गे लबागदेदा

साइबासे लमा परमेश्वरसे

थेदा सजाय पिन्जी।”*

३ थेनीगदेसे दो:सी घेन काइरी चुहङ्
भिजी,

“परमेश्वरदा जयजयकार तगै!

थे घेन शहर क्रोसी थोन्बा म्युगु

सदन तोरपट्टि निला।”*

४ ओच्छे थे बोगल गिकसे ब्लि

गन्बागदेदेन थे गोर ब्लि छोन्बो

जन्तुगदेसे ठिरी धन्छ्याबा परमेश्वरदा

फ्या लबान जयजयकार लजी। ओच्छे

थेनीगदेसे क्रिङ्बान चुहङ् भिजी।

“आमेन!, परमेश्वरदा जयजयकार

तगै!”

५ ठिग्याम घेन काइरी चुहङ् भिबा

थे:जी,

“परमेश्वरला गे लबादेन थे म्हाङ्सी

लोङ्बागदे जजा घेन जम्मासेन

य्हाङला परमेश्वरला

जयजयकार लउ।”*

६ जमाहेन्से डाइ म्हिला घेन हुलला

काइदेन छाँग्याम ताइबा क्युइला

आवाज ओच्छे घेन मु गुडुङ्बा
हङ्बान आवाजरी चुहङ् भिबा थे:जी,

“परमेश्वरदा जयजयकार तगै!

तिगदा भिसम जम्मान भन्दा घेन
परमप्रभु य्हाङला परमेश्वरसे
शासन लबा मुला।*
७ य्हाङ ल्हानान ताङ्सी परमेश्वरला

मानदेन जयजयकार लइ!
तिगदा भिसम य्हाङदा थार्बा पिन्बा

ग्यु बोगोला ब्याह लबा धिन
खसी जिन्बा मुला।
ओच्छे थेला चाङछारएनोन ठीक

तसी जिन्बा मुला।
८ चाङछारदा मलमलला य्हाल

य्हाल्बा सफा क्वान पिन्सी
जिन्जी।”
थे य्हाल य्हाल्बा मलमलला सफा

क्वान चा
परमेश्वरला म्हिगदेसे लबा

ज्यबा गे हिन्ना।
९ ओच्छे थे स्वर्गदूतसे डादा “एसे चु

ताम भ्रिउ, थार्बा पिन्बा ग्यु बोगोला
ब्याहला भोजरी निम्तो याङ्बा म्हिगदे
चा परमेश्वरग्याम मोलम याङ्बा
म्हिगदे हिन्ना” भिसी भिजी। थेसे
दो:सी डादा “परमेश्वरला सत्य
बचनगदे चुनोन हिन्ना” भिसी भिजी।*
१० जमाहेन्से थेला काङरी फ्या

लबाला लागिरी डा रूलुप तजी। तर
थेसे डादा चुहङ् भिसी भिजी, “एसे

डादा फ्या लबारी आत। डा चा एदेन
एला ह्गोदेदेन छ्याम ओच्छे येशूला
सत्य बचन ड्यान्बा म्हिगदे जम्मानदेन
छ्याम परमेश्वरला गे लबा म्हि जे
हिन्ना। थेतबासेलमा परमेश्वरदा जे
फ्या लउ। तिगदा भिसम अगमवक्तासे
पाङ्बाएनोन येशूला बारेरी पाङ्बा
सत्य बचन हिन्ना।

तार ताथोरी क्रे:सी निबा

११ डाइ स्वर्ग ठोङ्बा म्हाङ्जी,
च्यागो, थेरी तार ता गिक मुबा। थे
ताथोरी क्रे:सी निबा म्हिला मिन चा
विश्वास लखम्बादेन सत्य मुबा। थेसे
लबा निसाफदेन लडाइ ठीक मुला।*
१२ थेला मी मेला ल्हाम हङ्बान मुबा,

ओच्छे थेला थोबोरी ल्हानान मुकुट
कूबा मुबा। थेला डोरी मिन गिक भ्रिबा
मुबा, थे मिन थेदा बाहेक स्थान्दो
खालैदान था आरेबा।* १३ थेसे कारी

ब्लुम्बा क्वान क्वान्बा मुबा। थेला
मिन “परमेश्वरला बचन” मुबा।
१४ स्वर्गला सेनागदे मलमलला तार

सफा क्वान क्वान्सी तार तागदेथोरी
क्रे:सी थेला लिच्छा लिच्छा भ्रिजी।
१५ थेला सुङ्ग्याम छ्यार्बा तरवार

थोन्जी, ओच्छे थेसे थे तरवार थोसी
य्हुल य्हुलला म्हिगदेथोरी ढाला।
थेसे फाइला कडी थोसी थेनीगदेथोरी
शासन लला। ओच्छे कोलरी

अङ्गुर नाङ्सी म्हर्बा हङ् लसी थेसे
जम्मान भन्दा घेन परमेश्वरला घेन
बोमोसे नाङ्सी थेनीगदेदा म्हर्ला।*
१६थेसे क्वान्बा क्वानदेन काङ्स्हुरी
“ग्लेगदेला ग्लेदेन प्रभुगदेला प्रभु”
भिसी भिबा मुबा।

१७जमाहेन्से डाइ धिनीरी राप्सी
चिबा स्वर्गदूत गिक म्राङ्जी।
थेसे मुरी फ्याङ्बान लबा जम्मान
चरागदेदा घेन काइरी चुहङ् भिसी
भिजी, “परमेश्वरसे ठीक लबा घेन
भोज चबारी पोप तउ। १८ग्लेगदेदेन
कप्तानगदे ओच्छे शक्तिशाली म्हिगदे,
तागदेदेन ताथोरी क्रेःबागदे, ओच्छे
नोकर हिन्सै आहिन्सै, जजा, घेन
जम्मालान स्या चबारी खउ।”*

१९जमाहेन्से डाइ थे समुन्द्रग्याम
थोन्बा लोङ्बा खबा जन्तुदेन
जम्बुलिङला ग्लेगदे हाङ हाङला
सिपाही थोसी तार ताथोरी क्रेःबादेन
थेला सिपाहीगदेदेन छ्याम लडाइ
लबाला लागिरी पोप तबा म्राङ्जी।
२०तर थे समुन्द्रग्याम थोन्बा लोङ्बा
खबा जन्तुदेन थे जन्तुला डाच्छापट्टि
उदेकला गे लबा फट्टा अगमवक्तादा
चुङ्जी। उदेकला गे लसी थे फट्टा
अगमवक्तासे थे जन्तुला छापदेन
थेला मूर्तिदा पूजा लबा म्हिगदेदा
फसब लबा मुबा। थे न्हीदा छोन्बोन
गन्धकला लुङ्बा मेला ग्योइरी

भ्याङ्जी।* २१ओच्छे थे न्हीला
जम्मान सिपाहीगदेदा चा ताथोरी
क्रेःबाला सुङ्ग्याम थोन्बा तरवारसे
साइजी। ओच्छे चरागदेसे थेनीगदेला
स्या जम्मान घेन्ना चजी।

हजार गिक दिङ

२० जमाहेन्से डाइ ल्हानान
नुप्बा व्हाङला साँचोदेन
घेन च्याल्दा गिक यारी थोसी स्वर्ग-
ग्याम मार फाप्बान लबा स्वर्गदूत
गिकदा म्राङ्जी। २थेसे अजिङ्गरदा
चुङ्सी च्याल्दासे हजार गिक
दिङधोनाला लागिरी खीसी थान्जी।
थे अजिङ्गर चा दङ्बोला पुख्री
म्हङ म्हुङला ग्ले शैतान हिन्ना।* ३थे
अजिङ्गरसे दाहेन्से य्हुल य्हुलला
म्हिगदेदा फसब थालगै भिसी हजार
गिक दिङधोनाला लागिरी स्वर्गदूतसे
थेदा ल्हानान नुप्बा व्हाङरी भ्याङ्सी
थे व्हाङला म्नापरी ताल्चा लसी लाहा
छाप लजी। ओच्छे हजार गिक दिङ
छ्योमाहेन्से थेदा ला न्ही सोमला
लागिरी पुइतोःला।

४जमाहेन्से डाइ ठिगदेदेन ठिथोरी
धन्छ्याबागदे म्राङ्जी। थेनीगदेला
निसाफ लबा अधिकार पिन्बा मुबा।
ओच्छे डाइ येशूला सत्य तामदेन
परमेश्वरला बचन थेःना लबासे लमा
थोबो थासी साइबागदेला आत्मागदे

म्राङ्जी। थेनीगदेसे थे समुन्द्रग्याम थोन्बा लोङ्बा खबा जन्तुदेन थेला मूर्तिदा आतेन्बा मुबा ओच्छे डोदेन यारी थेला छापएनोन लबा आरेबा। थे आत्मागदे दोःसी सोजी ओच्छे हजार गिक दिङधोना ख्रीष्टदेन छ्याम शासन लजी।* ५ चुहङ् लसी सिबाग्याम दोःसी सोबा चा चु डाच्छा रेम हिन्ना। अर्गु सिबागदे चा थे हजार गिक दिङ आछ्योतेधोना आसोनी। ६ डाच्छारेम सिबाग्याम सोबागदे चा परमेश्वरग्याम मोलम याङ्बागदेदेन हाङला लागिरी फेसी थान्बा म्हिगदे हिन्ना। थेनीगदेदा दोःसी कालला शक्तिसे तिगै लआखम। तर थेनीगदे परमेश्वरदेन ख्रीष्टला पूजा लबा म्हि दोला ओच्छे ख्रीष्टदेन छ्याम हजार गिक दिङधोना शासन लला।

सदनना लागिरी शैतान नाश तबा

७ हजार गिक दिङ छ्योमाहेन्से शैतानदा च्युप्सी थान्बा ग्लाग्याम पुङला। ८ जमाहेन्से शैतान जम्बुलिङ नाङलान गोग ओच्छे मागोग भिबा यहुल यहुलला म्हिगदेदा फसब लबारी निला। शैतानसे लडाइ लबाला लागिरी थे यहुलला म्हिगदेदा ग्ला गिकरी पोप लला। थेसे पोप लबा म्हिगदे समुन्द्रला बालुवा तेनोन तला।* ९ थेला सेनागदेसे जम्बुलिङ नाङलान परमेश्वरला म्हिगदेला

पालगदेदेन परमेश्वरसे माया लबा शहरदा घेरब लजी। तर स्वर्गग्याम मे ताइसी थेला सेना नाश तजी। १० यहुल यहुलला म्हिगदेदा फसब लबा थे शैतानदा चा गन्धकला लुङ्बा मेला घ्योइरी भ्याङ्जी। थेरी डाच्छान थे लोङ्बा खबा जन्तुदेन लुसीला ताम पाङ्बा अगमवक्तादा भ्याङ्बा मुबा। थेरी थेनीगदेसे धिन म्हुन सदन सजाय नातोःला।

जम्बुलिङला म्हिगदेला निसाफ

११ जमाहेन्से डाइ घेन तार ठि गिकदेन थे ठिथोरी धन्छ्याबादा म्राङ्जी। ठिथोरी धन्छ्याबाला डाच्छाग्याम मुदेन जम्बुलिङ यार्जी ओच्छे दोःसी खानडएनोन आम्राङ्नी।* १२ डाइ घेन जजा जम्मान सिबागदे थे ठिला डाच्छापट्टि राप्सी चिबा म्राङ्जी। थेरी किताबगदे ठोङ्सी थान्बा मुबा, ओच्छे अर्गु किताब गिकएनोन ठोङ्जी। थे किताबला मिन चा जुकजुकधोनाला जुनी हिन्ना। थे जम्मान किताबगदेरी थेनीगदेसे लबा गेला बारेरी भिबा मुबा, थे गेगदे अन्छारनोन सिबागदेला निसाफ लजी। १३ समुन्द्रसे हाङदेन छ्याम मुबा सिबागदे दोःसी पिन्जी, कालदेन सिबा म्हिगदेला आत्मा चिबा ग्लासेनोन हाङदेन छ्याम मुबा सिबागदे दोःसी पिन्जी। ओच्छे थेनीगदे जम्मालान

ह्वाड ह्वाडसे लबा गे अन्छार निसाफ लजी। ^{१४}जमाहेन्से कालदेन सिबा म्हिगदेला आत्मा चिबा ग्लादा मेला घ्योइरी भ्याङ्जी। चु मेला घ्योइरी भ्याङ्बा चा दोःसी सिबा हिन्ना। ^{*}
^{१५}जुन म्हिला मिन जुकजुकधोनाला जुनीला किताबरी आस्याप्नी थेदा मेला घ्योइरी भ्याङ्गला।

परमेश्वरसे जम्मान स्हे छार स्होबा

२१ जमाहेन्से डाइ छार मुदेन छार जम्बुलिङ म्हाङ्जी। तिग्दा भिसम डाच्छाला मुदेन जम्बुलिङ म्हासी निबा मुबा, ओच्छे समुन्द्रएनोन आरेबा मुबा। ^{*} ^२ओच्छे डाइ परमेश्वरला शहर, छार यरूशलेम परमेश्वरग्याम स्वर्गहेन्से मार खबान लबा म्हाङ्जी। थे यरूशलेम म्हाछारला लागिरी ज्योसी थान्बा चाडछार हङ्बान मुबा। ^{*} ^३डाइ ठिग्याम चुहङ् भिबा घेन काइ गिक थेःजी, “च्यागो, परमेश्वर म्हिगदेदेन छ्याम धन्छ्याबा मुला। परमेश्वर थेनीगदेदेन छ्याम धन्छ्याला ओच्छे थेनीगदे थेला म्हि तला। थेहङ् लसीन थे ह्वाडनोन थेनीगदेला परमेश्वर दोःसी थेनीगदेदेन छ्याम धन्छ्याला। ^{*} ^४थेसे थेनीगदेला जम्मान मीरुली फ्यासी पिन्ना। ओच्छे

थेनीगदे दोःसी खाइमै आसि, खालैदान सुर्दा आत, खालैनोन आक्रा, ओच्छे खालैदान तिगै दुखएनोन आत। तिग्दा भिसम डाच्छाला तामगदे चा जम्मान म्हासी जिन्बा मुला। ^{*}

^५ठिरी धन्छ्याबासे डादा “च्यागो, डाइ जम्मान ताम छार स्होला” भिसी सुङ्जी। थेसे दोःसीनोन डादा “चु ताम भ्रिउ, तिग्दा भिसम चु तामगदे चा विश्वास लखम्बादेन सत्य मुला” भिसी सुङ्जी।

^६परमेश्वरसे डादा चुहङ् भिसी सुङ्जी, “दाहेन्से जम्मान ताम पूरा तसी जिन्जी। अल्फादेन ओमेगा ^{*} डानोन हिन्ना, ओच्छे शुरु लबादेन जिन्ना लबाएनोन डानोन हिन्ना। क्युइ फुइबागदेदा डाइ जुकजुकधोनाला जुनी पिन्बा क्युइला मुलग्याम ओहङ्गनोन थुङ्बारी पिन्ना। ^{*} ^७जुन जुनसे ढाला थेसे डाग्याम चु जम्मान हक याङ्गला। डा थेला परमेश्वर दोला ओच्छे थे डाला भा दोला। ^{*} ^८तर लोङ्बागदे, विश्वास आलबागदे, नइबा गे लबागदे, म्हि साइबागदे, स्थान्दोदेन छ्याम ब्रेल्सी भ्रबागदे, टुनामुना लबागदे, मूर्तिदा तेन्बागदेदेन जम्मान लुसीला ताम पाङ्बागदे चा गन्धकदेन लुङ्बा मेला घ्योइरी

२०:१४ उन्बा १:१८ २१:१ यशै ६५:१७; ६६:२२; २ पत्र ३:१३

२१:२ यशै ५२:१; ६१:१०; उन्बा ३:१२ २१:३ इजि ३७:२७; लेवी २६:११-१२

२१:४ यशै २५:८; ३५:१०; ६५:१६ २१:६ उन्बा १:८ २१:६ यशै ५५:१

२१:७ २ शामू ७:१४; भजन ८६:२६-२७

नितो:ला। चु मेला घ्योइरी निबा चा
दो:सी सिबा हिन्ना।

छार यरूशलेम

६ जमाहेन्से थे जम्मान भन्दा
लिच्छाला आपत विपतसे प्लिङ्बा
खोरे निस थोबा गोर निस स्वर्गदूतगदे
न्हडला गिक खसी डादा “खउ,
डाइ एदा चाडछार उन्ना, थे थार्बा
पिन्बा ग्यु बोगोला मिड हिन्ना”
भिसी भिजी। १० जमाहेन्से डा
परमेश्वरला आत्मासे प्लिङ्जी।
ओच्छे थे स्वर्गदूतसे डादा नोबा
गडरी भोर्सी परमेश्वरग्याम स्वर्गहेन्से
मार फाप्बान लबा परमेश्वरला
शहर यरूशलेम उन्जी। * ११ थे शहर
परमेश्वरला घेन यहालदेन शक्तिसे
प्लिङ्बा मुबा। ओच्छे थे शहर चा
ल्हानान बिल्लौरदेन रत्नगदे ओच्छे
स्फटिक हड्बान भक्भक्बा मुबा।
१२ थे शहरला क्युर्नोन च्युक न्ही म्राप
थान्सी स्होबा घेन घेन नोबा पर्खाल
मुबा। थे म्रापदडसेन गोर गिक
गिक स्वर्गदूत मुबा। थे म्रापदडसेन
इसाएलला च्युक न्ही वंशला मिन
भ्रिबा मुबा। * १३ स्यारपट्टि म्राप सोम,
भ्याडपट्टि म्राप सोम ल्होपट्टि म्राप
सोम, न्हुपपट्टि म्राप सोम मुबा। १४ थे
शहरला पर्खालला जगरी ग्ला ग्लारी
च्युक न्ही घेन घेन युडबा थान्बा
मुबा। थे युडबादडसेन थार्बा पिन्बा

ग्यु बोगोला च्युक न्ही मुल चेलागदे
गिक गिकला मिन भ्रिबा मुबा।

१५ थे शहरदेन शहरला म्रापगदे
ओच्छे पर्खाल दप्बाला लागिरी
डादेन छ्याम ताम पाङ्बा स्वर्गदूतदेन
छ्याम म्हरला दप्बा स्हे गिक
मुबा। * १६ थे शहर चारपाटे मुबा। थे
शहरला लम्बाइदेन चौडाइ च्योच्यो
मुबा। थेसे थे दप्बा स्हेसे शहर दप्मा
हजार न्हीसे ग्यार्जा ब्लि किलोमिटर
मुबा। थे शहरला लम्बाइ, चौडाइदेन
नोबा च्योच्यो मुबा। १७ स्वर्गदूतसे
पर्खालएनोन दप्जी। म्हिगदेसे चलब
लबा दप्बा स्हे अन्छार थे पर्खाल
बोगल सोमसे मिटर डा ब्लाक्बा
मुबा। चु दप्बा स्हे स्वर्गदूतलाएनोन
हिन्ना। १८ थे पर्खाल बिल्लौरग्याम
स्होबा मुबा। ओच्छे शहर चा ज्यबा
म्हरग्याम स्होबा मुबा। थे शहर सफा
सिसा हड्बान यहाल यहाल्बा मुबा।
१९ थे पर्खालला जगरी युबा थे घेन
घेन युडबारी ल्हानान थरीला महंगो
रत्नगदे थान्बा मुबा। पर्खालला जगरी
थान्बा थे घेन घेन युडबारी रत्न गिक
गिक थान्बा मुबा। जम्मान भन्दा
डाच्छा थान्बा युडबारी चा बिल्लौर,
जमाहेन्से अर्गु युडबारी नीर, हरित
रत्न, पन्ना, २० थेहड् लसीन आनिक्स,
लालमणि, पीतमणि, बेरूज, पुष्पराज,
लसुने, नीलमणि, ओच्छे जम्मान
भन्दा लिच्छाला युडबारी चा कटेला

थान्बा मुबा।^{† २१}थे शहरला च्युक न्ही
प्राप चा च्युक न्ही मोतीग्याम स्होबा
मुबा। जम्मान प्रापगदे चा मोती गिक
गिकग्याम स्होबा मुबा। थे शहरला
ग्याम सफा सिसा हङ्बान ज्यबा
म्हरग्याम स्होबा मुबा।

^{२२}डाइ थे शहर न्हडरी मन्दिर
गिकनोन आम्राङ्नी। तिग्दा भिसम थे
शहरला मन्दिर चा जम्मान भन्दा घ्रेन
परमेश्वरदेन थार्बा पिन्बा ग्यु बोगो
ह्वाडनोन हिन्ना। ^{२३}थे शहरदा य्हाल
तना लबाला लागिरी धिनीदेन लनी
आतोः। तिग्दा भिसम परमेश्वरला
य्हालदेन शक्तिसेन थे शहरदा य्हाल
तना लमुला। थे शहरला नाडसल
चा थार्बा पिन्बा ग्यु बोगो ह्वाडनोन
हिन्ना।^{*} ^{२४}परमेश्वरला य्हालरीन
य्हुल य्हुलला म्हिगदे भ्रला। ओच्छे
जम्बुलिङ नाडलान ग्लेगदेसे ह्वाड
ह्वाडला धन सम्पत्तिदेन मान थे शहररी
भला।^{*} ^{२५}थे शहरला प्रापगदे धिनीरी
खाइमै आडुङ, तिग्दा भिसम थेरी
म्हुन तनोन आत। ^{२६}य्हुल य्हुलला
म्हिगदेसे ह्वाड ह्वाडसे याङ्बा मानदेन
ल्हानान धन सम्पत्ति थे शहररी

भला।^{*} ^{२७}तर नइबा तामगदे,
आज्यबा पेःबा खबा गे लबागदेदेन
लुसीला ताम पाङ्बागदे तिगै लसीन
थे शहररी वाङ्आम्याङ्। थार्बा पिन्बा
ग्यु बोगोला जुकजुकधोनाला जुनीला
किताबरी मिन मुबा म्हिगदे जे थे
शहररी वाङ्म्याङ्ला।^{*}

जुकजुकधोनाला जुनी पिन्बा स्योड

२२ जमाहेन्से थे स्वर्गदूतसे
डादा स्फटिक[†] हङ्बान
भक्भक्बा जुकजुकधोनाला जुनी
पिन्बा क्युइला स्योड उन्जी। थे स्योड
परमेश्वरदेन थार्बा पिन्बा ग्यु बोगोला
ठिग्याम थोन्जी।^{*} ^२ओच्छे थे स्योड
थे शहरला ग्यामला गुङग्याम तबान
निबा मुबा। थे स्योडला कुनी न्हीरीन
जुकजुकधोनाला जुनी पिन्बा दोड
मुबा। थे दोडरी लाएनोनदडसे थरी
थरीला रो रोमुबा। थेरी दिङ गिकरी
च्युक न्ही थरीला रो रोमुबा। थे
दोडला भा चा य्हुल य्हुलला म्हिगदेदा
खम्ना लबा मन मुबा।^{*} ^३दाहेन्से थे
शहररी मुबा खजिबै स्हेदा परमेश्वरसे
आकेः।[†]

२१:१६-२० २१:१६-२० चु पदरी ल्हानान रत्नगदेला मिन मुला। चु पदरी पाङ्बारी म्हाइबा
चा अर्गुन अर्गुन छोनना य्हालदेन ल्हानान य्हाल य्हाल्बा ओच्छे भक्भक्बा मुला भिसी
पाङ्बा हिन्ना।

२२:१ “स्फटिक” भिबा चा सिसा हङ्बान भक्भक्बा सफा स्हे हिन्ना।

२२:३ चु पदरी “आकेः” भिबा चा सराप आयु भिबा हिन्ना।

२१:२३ यशै ६०:१६-२० २१:२४ यशै ६०:३ २१:२५-२६ यशै ६०:११

२१:२७ यशै ५२:१; इजि ४४:६ २२:१ इजि ४७:१; जक १४:८

२२:२ उत्प २:६; इजि ४७:१२

परमेश्वरदेन थाबा पिन्बा ग्यु बोगोला ठि थे शहररीन तला, ओच्छे थेला म्हिगदेसे थेदा तेन्ना।*४ थेनीगदेसे परमेश्वरला स्यहाल म्राङ्ला, ओच्छे थेनीगदेला डोरी थेला मिन भ्रिबा तला। ५ थे शहररी दोःसी खाइमै म्हुन आत। थेनीगदेदा नाडसलदेन धिनीला यहाल आतोः। तिग्दा भिसम परमप्रभु परमेश्वरनोन थेनीगदेला यहाल दोला। ओच्छे थेनीगदेसे थेरी सदन शासन लला।*

६ स्वर्गदूतसे डादा चुहङ् भिसी भिजी, “चु बचन विश्वास लखम्बादेन सत्य मुला। अगमवक्तागदेदा हाडला आत्मा पिन्बा परमप्रभु परमेश्वरसे हाडला गे लबा म्हिगदेदा योनान तबा तामगदे उन्बाला लागिरी स्वर्गदूत पुइखबा मुला।”

येशू योनान फेप्खबान मुला

७ येशूसे चुहङ् भिसी सुङ्जी, “च्यागो, डा योनान खबान मुला! चु किताबरी भ्रिबा अगमवाणीला बचन अन्छार भ्रबागदे परमेश्वरग्याम मोलम याङ्बागदे हिन्ना।”

८ चु जम्मान ताम थेःबादेन म्राङ्बा डा यूहन्ना हिन्ना। डाइ चु जम्मान ताम थेःबादेन म्राङ्माहेन्से डादा चु ताम उन्बा स्वर्गदूतदा फ्या लबारी डा

कू तजी। ९ तर थेसे डादा चुहङ् भिसी भिजी, “च्यागो, एसे चुहङ् लबारी आत। डा मी एदेन एला ज्योज्यो आले अगमवक्तागदे ओच्छे चु किताबरी भ्रिबा ताम ड्यान्बागदे हङ्बा परमेश्वरला गे लबा हो जे हिन्ना। परमेश्वरदा जे फ्या लसी तेन्गो।”

१० जमाहेन्से थे स्वर्गदूतसे डादा चुहङ् भिसी भिजी, “चु किताबरी भ्रिबा अगमवाणीला बचन आपाङ्ना कुटिसी थाचिउ। तिग्दा भिसम चु जम्मान तामगदे तबारी छ्याइबा मुला। ११ नइबा गे लबा म्हिसे नइबान गे लसी चिगै, पेःबा खबा गे लबा म्हिसे पेःबा खबान गे लसी चिगै, ज्यबा गे लबा म्हिसे ज्यबा गे लसीन चिगै, ओच्छे तिगै दोष आरेबा म्हिसे तिगै दोष आरेबा गे लसीन चिगै।”*

१२ येशूसे चुहङ् भिसी सुङ्जी, “च्यागो, डा योनान खबान मुला! डा इनामदेन सजाय भसी खला। जमाहेन्से डाइ जम्मान म्हिगदेदा थेनीगदेसे लबा गे अन्छार इनामदेन सजाय पिन्ना।* १३ अल्फादेन ओमेगा, डाच्छादेन लिच्छा ओच्छे शुरु लबादेन जिन्ना लबा डानोन हिन्ना।*

१४ “जुकजुकधोनाला जुनी पिन्बा दोडला रो चबा हक याङ्बारीदेन शहरला म्रापगदेग्याम न्हङरी

२२:३ जक १४:११ २२:५ यशै ६०:१६; दानि ७:१८ २२:११ दानि १२:१०

२२:१२ यशै ४०:१०; ६२:११; भजन २८:४; यर्मि १७:१०

२२:१३ उन्बा १:८, १७; २:८; यशै ४४:६

वाङ्म्याङ्गै भिसी हाड हाडला क्वान
खुबागदे[†] चा परमेश्वरग्याम मोलम
याङ्बागदे हिन्ना। * १५ तर नगी हड्बा
म्हिगदे, टुनामुना लबागदे, स्थान्दोदेन
छ्याम ब्रेल्सी भ्रबागदे, म्हि साइबागदे,
मूर्तिदा तेन्बागदे, लुसीला ताम सेम
निबागदेदेन लुसीला ताम अन्छार
भ्रबागदे चा शहरला मङ्ग्यार तला।

१६ “डा येशूसे मण्डलीगदेरी मुबा
जम्मादान चु तामगदे था तना लबाला
लागिरी एनीगदे मुबा ग्लारी डाला
दूत पुइखबा मुला। दाऊद ग्लेला
मुल सन्तान डानोन हिन्ना। ओच्छे
स्थोला भक्भक्का सारएनोन डानोन
हिन्ना।”[†] *

१७ परमेश्वरला आत्मादेन
चाडछारसे “फेप्खउ” भिसी भिला।
जुन म्हिसे थे ताम थे:ला थेसेनोन
“फेप्खउ” भिसी भिगै। जुन म्हिदा
क्युइ फुइला थे खसी जुकजुकधोनाला
जुनी पिन्बा क्युइ ओहङ्गोन थुङ्गै। *

१८ च्यागो, चु किताबरी भ्रिबा
अगमवाणीला बचन थे:बा म्हिगदेदा
डाइ पाङ्गला।

चुदे खालै म्हिसे चु किताबरी
भ्रिबा तामरी अर्गु ताम काप्जी भिसम
चु किताबरी भ्रिबा जम्मान आपत
विपतगदे परमेश्वरसे थेदा काप्सी
पिन्ना। १९ ओच्छे खालै म्हिसे चु
अगमवाणीला किताबरी भ्रिबा
बचनग्याम तिगै ताम ते:जी भिसम चु
किताबरी भ्रिबा जुकजुकधोनाला जुनी
पिन्बा दोडदेन परमेश्वरला शहरग्याम
थेसे याङ्तो:बा हक परमेश्वरसे
थेग्याम ब्यन्ना। *

२० चु जम्मान तामगदे उन्बादेन
सुङ्बासे चुहङ्ग भिसी सुङ्बा मुला,
“हिन्ना, डा योनान खबान मुला।”

आमेन, फेप्खउ, प्रभु येशू।

२१ परमेश्वरला जम्मान म्हिगदेदेन
छ्याम प्रभु येशूला दयामाया तगै।
आमेन।

२२:१४ “हाड हाडला क्वान खुबागदे” भिबा चा येशूदा विश्वास लसी येशूला काग्याम
पापला दोष मेटब तबा म्हिगदे हिन्ना।

२२:१६ “स्थोला भक्भक्का सारएनोन डानोन हिन्ना” भिबा चा थार्बा पिन्बा स्त्रीष्टसे
हाडलान छार धुइ शुरु लला भिबा हिन्ना।

२२:१४ उत्प २:६; ३:२२ २२:१६ यशै ११:१, १० २२:१७ यशै ५५:१

२२:१८-१९ व्यव ४:२; १२:३२